

MU BWIKADI BWÈNDÈ



Twasàkidila, Mwanèètù Neville, Mukalenge àkubènèshè bibanjike menemene.

Ne mwoyi wènù awu dilòlò edi, balundà bàanyi. Edi ndyèsè dinènè dyà kwikalakù baalùkile cyàkàbìdì kaaba aka mu citanda emu dilòlò edi, ne tuumvwakù Bwikadi bwà Mukalenge wetù bütù kabùyì bupangika abu, bu mwàkafilàYe mulayi. Nènku mpindyewu, ndi mumanyè ne bààbúngì bàà kunùdì mbashààle muneemu bwà Diyishi dikesè dyà dilòlò edi edi, cìndi naaci ne kusàkidila kwàbúngì. Kàdi bààbúngì bàà kunùdì nebiikalè kàbìdì ne cyà kwendesha màshinyi kuya kule dilòlò edi, bwà kwalukila kumbèlu. Bakwàbò bàkaadi bamanè kuumuka ku bilààla-beenyi, mungümvù bàmba. Nènku netùteetè bwà kubènga kunùlama ntántà mule, nènku ki bwà cinyi tudi babwelè kumpàlà kwà dìbà bwà twètù kupàtuka kumpàlà kwà dìbà.

² Nènku mpindyewu netwikalè, pàndì ànu ne ngààpeci mùshindù, nèmmanyishè ne ndìbà kaayi ditwikalà pàmwàpa ne cyà kubanga, ndi mupetè ndambù wa mabiikila a ku téléfònè mu mapingaja emu, bamanyè dìbà ditwikalà mwà kubanga mikàndà eyi, anyi nshapità eyi. Ne ndi ngeela meeji ne, bu Mukalenge mwà kwanyisha, ndi muswè kwangata, musangu wàlondà wutwàbangà, pa Bitampì Mwandamutekètè byà Bwàkabuulwibwà, ne bitampì mwandamutekètè byà mu bufùki. Nènku, dìbà adi twètù bajikije pa dìbà, netwàngatè bitampì mwandamutekètè byà paanyimà pàà Mukàndà awu abi, nwamònu's. Mpindyewu, aci cìdi mwà kwangata ndambù wa dìbà. Nwamònu's, kùdi bitampì mwandamutekètè bìdì bikàngùdìbwe; kùdi bipùpù mwandamutekète, mpungi mwandamutekète, byònsò abi mwandamutekète mwandamutekete; ne bitampì abi mbitùdì bafwànyine kwangata dyàmbedi. Kàdi pashiishe paanyimà pàà Mukàndà mpakànga ne bitampì mwandamutekète. Danyèlè wakumvwa mèyì awu, mikungulu, ne bààkamukàndika bwà kuàfùnda. Yone, bààkamukàndika bwà kuàfùnda. Kàdi àvwa matwibwe citampì paanyimà pàà Mukàndà, mbwena kwamba ne, paanyimà pàà maalu masokoka ónsò a Mukàndà mamana kufdiibwa ne mamana kubuulula. Nudi bamòne ne Danyèlè mmwambè mwaba awu ne: “Maalu masokoka mu matùkù a mèyì aa, bwalu busokoka bwà Nzambi bìvwa ne cyà kuvùnguludiibwa ku ciinè cikondo aci.” Nwamònu's, “bwalu busokoka,” bwà ne Nzambi nganyi, mwàkavwijiibwàYe mubidi, bintu byònsò ebi bìvwa ne cyà kuvùnguludiibwa ku ciinè cikondo aci. Nènku dìbà adi—dìbà adi netwikalè badilongòlòle bwà Bitampì Mwandamutekète byà paanyimà pàà Mukàndà,

bìdì kabiyi nànsha bibuulwila muntu, kabiyi nànsha bifùnda mu Bible to, kàdi nebiikalè ànu ne cyà kupàlakajii bwa ànu menemene ne bikwàbò byà mu Bible, ne ndi ngeela meeji ne neciikalè cintu cinène.

³ Nènku mpindyewu netwikalè mwà kuteeta bwà kulwijakaka bwà kujikija. Tudi twela muntu ne muntu wa kunùdì twasàkidila bwà musàngeelu wènu ne diikalapù dyènù, ne—ne byònsò binùdì benzè, tudi tunwèla twasàkidila wàbùngì. Ne mpindyewu ndi—ndi mutwìshìbwe ne katwàkunùlama ntàntà mupitèpite bule dilòòlò edi to, bwalu nudi ne lutùulù lwàbùngì bwà kusòmba, kwimana kuulu. Mukàjàànyì ùvwa wàmba paanyimà pààpa, ùvwa wàmba bwà makèèlèlè dilòòlò awu, wàmba ne: “Mémè kumòna bakàjì bàvwa mene banènè bàà katankù, biimane kuulu mwaba awu, ne bilàmbà byàbò bibolè bolebole, biimàne kuulu mwaba awu, biikàlè bàbàkula ànu Dìyì dyònsò.” Ki bwà cinyi ntu muswè kushààla mu dilaabiibwa dyà Nyumà Mwimpè, bwà paùdì upàtuka wèwè kwambila bantu Bulelèlè bwà meeji matòòke, nwamònu’s, ne ànu Bulelèlè pa bwòbù. Nènku dîbà adi bàdi mwà kushààla pa Cyòci aci ne nebiikalè ànu bìmpè.

⁴ Mpindyewu ndi muswè kunùlòmba dilekela bwà katanci kakesè. Mvwa muumùke kumpàlà kwà dîbà ndambù mu dindà emu. Ne mikàbà yà mèyi mmiimanyika pa dîbà edi, ne mémè—mémè mu katanci emu nêngàmbilè bakwàci bàà mèyi pa mikàbà dîbà dyà kubangabò kukwàta mukàbà. Ndi muswè njikijè *Dibala Dyà Kwenda Kupingana Cyànyimà*, tusunsa tùtaanu bwà cyòci aci, kumpàlà kwà mémè kuumuka. Mvwa mupwè mwoyi kàdi kuya, mvwa ànu mwangàcike mu dindà emu mu mùshindù wà mupàtùke e kuya ncìyi ngamba kantu nànsha kàmwè pa bwalu abu to. Kàdi, mvwa munùshìile ànu pa ne: “Dibala dyà kwenda kupingana cyànyima ncinyi?” Nwamònu anyi? Ndi mumanyè ne tudi mu dibala dyà kwenda kupingana cyànyima, kàdi dibala dyà kwenda kwalukila cyànyima ncinyi? Nwamònu anyi? Wèwè kùyi mumanyè cidì dibala dyà kwenda kupingana cyànyima to, dîbà adi newikalè mu cibwejàkàjì mu mùshindù kampànda. Nènku ndi—ndi muswè ku—kucìjikija, ànu, ne kuteeta bwà kwikala ànu mu cikèmù cìmwè cìmwà naaci bwà kujikija mukàbà wà mèyi ewu mpindyewu, bwà mukàbà wà mèyi kupàtukawù: *Dibala Dyà Kwenda Kupingana Cyànyimà*. Mpindyewu nwènù bònsò nenùmfwilèku luse ànu bwà katanci cyanààna, nènku ndi muswè kujikija mukàbà wà mèyi awu. Nenùmfwilèku luse anyi bwà katanci kakesè cyanààna, pashiishe túbangè mukwàbò? [Disangisha dìdì dyàmba ne “Amen.”—Muf.] Nènku mpindyewu—mpindyewu bakwàci bàà mikàbà yà mèyi, bu nwènù mwà kuswà, twàyaaku mbòta bwà kwendesha mukàbà wà mèyi mpindyewu. [Katùpà kàà mukàbà wà mèyi munda mutupù—Muf.]

[Mwanèètù Branham ùdì ùmvwija mu kasaka kii⁴ too ne ku kii⁵ ne yèyè ùvwa mukùmbàje katùpà kàvwà kapangike aka mu

diyisha dyèndè dyà mu dindà divwà ne cyena-bwalu cyà ne: *Dibala Dyà Kwenda Kupingana Cyànyimà*, bu kasaka kàà 106 too ne ku kàà 111—Muf.]

⁵ Tufùmina ànu ku myaba mishiileshiiilàngàne, ne tudi bapicile mu cikondo cyà dicyònkómoka mu mayiisha àsàtù a ndekeelu awu, a dyakula pa cyena-bwalu cyà—cyà malongesha mashiileshiiilàngàne ne bikwàbò bitùdì batwàle. Ndi mfùma ku divùluka pa díbà edi ne bidi bikèngela mfilè kaamwaba kakesè muntwamu, nwènú bàdi bàtèèlejà mukàbà wa méyi bwà, bwà kushintulula mikàbà yènú yà méyi ayi. Nennwámбилè díbà dyà kwendesha bisanjì. Èyo. Mpindyewu, bikèngela ntangilè cyòci eci. Bidi bimwèka ànu bu mushiki wà bintu byenza byà kwísùkwísù, kàdi bikèngela bwà nsongàalùmè yàya yipetè mukàbà wà méyi awu. Ne kabèèna mwà kuwùpeta mwikàle wònsò mu cimvundù to; bóbò bawùpetè nàнку, bantu bàdi kwàka abu kabàakubyumvwa to. Pa nàнку bikèngela tucyàngàtè mu mùshindù ewu. Nèнку bu muntu mwà kupàtukakù mu cibambalu amu bwà kummanyisha kuntwaku, Junior, pàkaadìbo pabwìpi ne kushintulula mikàbà yà méyi apu. Twasàkidilaayi wabúngì, nwènú biinè, mùndì ngamba cyàkàbìdì, bwà musàngèelu wènú wònsò ne bikwàbò byònsò. Èyo, tudi pabwìpi mpindyewu, nudi mwà kuteemeshaayi bisanjì.

⁶ Mukalenge ànùbènèshè. Tudi ne disànkà dyà kwikala cyàkàbìdì mu tabernacle emu dilòòlò edi. Mwaba mmupàte patapata ne bantu bàabúngì biimàne cyàkàbìdì kuulu myaba yònsò dilòòlò edi, ne matùkù àsàtù a . . . anyi misangu yisàtù yà masangisha. Ndi muswè bwà ne muntu yéyè mutèèlèje mukàbà wà méyi ewu, wàswakù kwalukila bwà kupeta mukàbà wà dilòòlò dyà ndekeelu. Nùwùlongèlaayi mu nzùbù yènú. Ncitupà cyà mpindyewu cyà mudimu wà bwambì wùdì Mukalenge mumpèeshe. Ndi muswè nangàngà bwà bambi bàteelejè cyòci aci kumpàlà kwà mémè kukùmbula èkèleeziyà yàbò ne kubwela mu nzùbù yàbò. Mpindyewu ndi muswè bwà bóbò ku—kupeta cyòci aci. Mpindyewu, mu dindà emu twakùlù pa *Dibala Dyà Kwenda Kupingana Cyànyimà*, Èkèleeziyà pabwìpi ne kuumuka.

⁷ Nèнку mpindyewu dilòòlò edi, bu Nzambì mwà kwanyisha, netwàkulè pa cyena-bwalu cyà *Mu Bwikadi Bwèndè*. Nèнку, kaa, mùshindù mwinè wutùdì twela Nzambì twasàkidila bwà dyèsè ditùdiku naadi bwà kumòna mwà kubwela mu Bwikadi Bwèndè's wè. Kàdi, dyàmbedi, ndi njinga bwà nùbuululè bònsò pàmwè naanyi mu Bibles yènú ku mupròfetà Yeshàayi, nshapitá mwi6 wa mupròfetà Yeshàayi. Tudi bònsò bamanyè ne Yeshàayi ùvwa mupròfetà munène, ne ùmwe wa ku bapròfetà banènè bàà mu ditùkù dyèndè. Wàkajikija wèndè mwoyi wà pànu mu dikòshibwa bitùpà bitùpà ne sí, bwà bujaadiki, bu mufwile diitabuuja bwà bukolè bwà Nzambì wa Bukolè bwònsò.

Mu Mukàndà wà Yeshààyi, nshapità mwi6, ndi mbangila ku mvnsà mwi5, ne kubala. “Pashiishe mèmè kwamba ne: ‘Dyàkabi dyànyì!’ Bwalu . . .” Pàmwàpa ndi mbangila ku mvnsà wa kumpàla. Anji mfwilàayikù luse bwà katanci kakesè. Tùbangilàayi ku mvnsa wa kumpàla bwà kubala too ne kwìnshì lwà ku mvnsà wa 8.

Mu cidimu cyàkafwà mfùmù Uzìyà ngàkamòna kàbìdì Mukalenge musòmbe pa nkwasa wa butùmbi, mutùmbùke ne mubàndisha kuulu, ne musùmbà wà paanyimà pèndè wùvwa muujè ntempèlù tètè.

Kumutù kwàci kùvwa kwimàne baselèfimà: yònsò mwikàle ne mapwàpwà àsambòmbò; ne àbìdì úvwa mubwikile kwisù, ne ne àbìdì úvwa mubwikile makàsà, ne ne àbìdì úvwa ùbùuka naawù.

Ne umwe úvwa wèla mukwèndè lubilà, wàmba ne: Wa cijila, wa cijila, wa cijila, m’MUKALENGÈ Nzambi wa bilwìlu: ne buloba bujimà mbùle tètè ne butùmbi bwèndè.

Ne makunji a ciibi àvwa ànyunga ku dîyi dyà úvwa wela lubilà awu, ne nzùbu wàkuula tètè ne mwìshì.

Pashiishe mèmè kwamba ne, Dyàkabi dyànyì! bwalu kwànyì kwàjiki; bwalu ndi muntu wa mishikù mibiipe, ne ndi musòmbèle munkaci mwà . . . bantu bàà mishikù mibiipe: bwalu mèsù àànyì àmònu Mfùmù, MUKALENGÈ wa bilwìlu.

Ki umwe wa ku baselèfimà kubùukayè ne kulwayè kùndì, mwikàle ne dikàlà dyà mudilu mu cyanza, dìvwàye mwanjàte ne lukwàtù pa cyoshelu:

Ne wàkaditèeka pa mishikù yànyì, ne wàkamba ne: Mòna, eci nyewù cyàlengi mishikù yèbè; ne bubì bwèbè bùmùshùbù, ne mpèkaatù wèbè wàkezùdìbù.

Ngàkumvwa kàbìdì dîyi dyà Mukalenge, dyàmba ne: Nganyì ùngààtùmà, ne nganyì wàya kaaba kètù? Dìbà adi mèmè kwamba ne: Mmèmè ewu; ntùmaanyì.

⁸ Mukalenge àbèneshèku Dìyi Dyèndè. Ngeela meeji ne awu m’Mufùndù wà wùtàmba kupapulangana. Tudi tusangana ne, mu Bwikadi bwà Nzambi, bantu bàdì bàdìjingulula bóbò biinè ne mbangènzàmpèkàatù. Tudi mwà kudyùmvwa bimpè be patùdì tusanganyibwa mu myaba mishùlèshùlàngàne, ne tudyùmvwa ne tudikù ànu bantu bimpè, kàdi patùdiku ànu tubwela mu Bwikadi bwà Nzambi anyì, dìbà adi tudi tumòna mutùdì bakesè.

⁹ Mvwa mwimàne ànu àbìdì aa ne—ne mulundà wanyì kampànda úmvwà mupetèku dyèsè dyà kulombola kùdì Kilistò, Bert Call, mu New Hampshire mwàmwa, mwena dyànyì wa mu bulembi, tuvwa biimàne pabwìpì ne cibila cyà Cold Brook

Falls mu mikùnà yà Adirondack mwàmwa, ne cívwa ncibila cinènè cyà dikèma. Mvwa muyè ne dikù dyànyì cidimu cishààle kuntwaku bwà kucibandila. Kule menemene ne njila, bikèngela bwà kwenza lwendu lule ku makàsà bwà kakùfika. Nènku patwàkamònà màyi a diikala dyà màyi a matàmbà ne a bleu awu àpòngoloka ne bukolè bunène àfùmina mu mikùnà, ne icikidila pa mbwebwe, Bert ùvwa mwimàne mwaba awu muntàngile, kwambayè ne: “Kya, Billy, s’cidi cifikisha muntu ku didyùmvas mukesè *nùnkù’s*,” ùpima ne minu yèndè bunènè bwà millimètres yisambòmbò. Ki mémè ne: “Ncyà bushùwà, Bert.” Mpindyewu, ki cyònsò civwàye pèndè mumanyè bwà dibwela dyà mu Bwikadi bwà Nzambi ncyòci aci, mu kumònà kwà bufùki Bwèndè.

¹⁰ Ndi ndikonka bwà muntu wàkafùnda *Mùshindù Mwinè Wùdi Munène’s Wè* awu, ní kàvwakù mutàngile muulu bufùkù kampàndà ne mutàngile mitootò, mùdiyì yisanganyibwa mu ntàntà mule! Kùkaadi ndambù wa ngondo, Mwanèètù Fred, Mwanèètù Wood ne mémè, tuvwa biimàne ne Mwanèètù Mc Anally mu cipèèlà cyà mu Arizona mwàmwa, tuvwa tupima, tuteeta, mùtootò wùmwe, mùvwàwu pabwìpi ne mukwàbò. Miikàle mishìilàngàne ntàntà wa kilòmèètà miliyò ne milliyaalà, kayivwa yimwèka bu mishìilàngàne ntàntà wa mupite pa millimètres yisambòmbò wùmwe ne mukwàbò to. Pashiishe twètù kubanga kwela meeji, bilondeshile cijaadiki cyà maalù a mamanya cyà cyòci aci ne, mitootò ayi yidi pàmwàpa mu ntàntà wùmwe ne mukwàbò mupite ntàntà utùdi twètù naayi. Nudi numòna mùdi bwalu anyi?

¹¹ Pashiishe tudi tufika ku dijingulula mutùdi bakesè patùdi tufika ku dijingulula mùdiYe Yèyè munène, ne mutùdi tuseemena pabwìpi patùdi tulwa mu Bwikadi Bwèndè. Mu mùshindù kampànda, cikaadi misangu yònsò ànu cyenzè cikùmà cinènè pa bantu pàdìbo bàbwela mu Bwikadi bwà Nzambi. Nkààdikù mumòne cikondo mu mudimu wànyì wà bwambi cyùdi mufwànyine kumòna Bwikadi bwà Nzambi bùlwa mu mùshindù wà ne mbifwànyine kuseemeja muntu ne kumusokolwela ànu nsòmbelu wendè, ne kwela patòòke mpèkaatù yèndè yà mishindù yònsò yà byenzedi byà nsòmbelu wa masandi, ne ciikàle citwàla cinyàànyà cyà cijila munkaci mwà bantu mu mùshindù wà bafwànyine kupàtuka mu mulongo wà babèèdi kumpalà mene kwà kuseemenabò bwà kubàsambidilabò, ne kulwa lubilu ku cyoshelu ne kudìlongolola kumpalà kwà Nzambi kumpalà kwà kubwela mu Bwikadi Bwèndè. Nwamònu’s, kùdi cintu kampàndà pa bìdi bìtàngilà kubwela mu Bwikadi bwà Nzambi, cidi cyènza ne maalù ènzekè. Nkààdikù mumòne bantu balààle mu tulààlù twà dibùnya ne tulààlù twà dyambwila babèèdi.

¹² Dilòòlò adi ku Mexique kwàka, pàvwa mwànà mukesè mufwè awu mulààle mujìngila mu mbùlankète apu, uvwàbò balwè nendè kùdi maamù mutekète wa beena Espagne awu, anyi maamù mutekète wa beena Mexique’s wè, mulwè nendè.

Pàakamònàbo, bantu binunu byàbûngi bamòne, pàmwàpa binunu makùmi àtaanu anyi makùmi mwandamutekètè ne bitaanu mu disangisha òmwèpelè, bamòne mwànà mukesè wa mu dibòko awu mubiike ku lufù, bakàji bààkuuminyina, bantu bààkeela byanza byàbò muulu bèèla mbilà mikolè. Bwà cinyi? Bààkajingulula ne muntu wetù ewu kàvwakù mwà kwenza aci to, ne bàvwa bàsanganyibwa mu Bwikadi bwà Nzambi wa Bukolè bwònsò. Cyàkafikisha cintu kampànda ku dyenzeka.

¹³ Nkààdikù mupetè dyèsè dyà kuumvwa bantu bàà difwàna dyà Nzambi bàakula. Bààkambakù musangu kampànda bwà Charles Finney, muntu mukesè wa meneme, kàyikù mwà kwikala ne bujitu bupite pa kilò makùmi àtaanu to, kàdi ùvwa ne mùshindù kampànda wà bukolè wà kwakula mu mùshindù wà ne. . . Ùvwa ùteeta bipàtudi bya mèyi dîngà ditùkù mu citanda kampànda. Kabàvwa ne ndongolwelu yà mèyi musangu awu to. Kàdi kùvwa muntu kampànda ùlongolòla, kuulu ku cisàsà, anyi kuulu mu musàkà wà nzùbu awu, nènku kuumvwayè muntu awu ùbwela, kàdi kàvwa mumanyè ne ùvwa nganyi to, kushààlayè ànu mupùwe. Nènku Mukalenge Finney ùvwa ùkèba kuteeta bipàtudi bya mèyi abi. Paanyimà pàà mumanè kupìcishila dîbà dyàbûngi mu kusambila bwà ditàbuluja òvwàye ne cyà kwenza adi, kuteetayè dîyi dyèndè bwà kumòna mùvwàdi difwànyine kuya. Kudifindayè lubilu mu cyambilu, e kwambayè ne: “Nyingàlalaayi, bwà cyanààna nudi nubùtuka!” Nènku wàkacyàmba ne bukolè—bukolè bwàbûngi paanyimà pàà mumanè kwikala mu dilaabiibwa dyà Nzambi, mu mùshindù wà ne muntu awu wàkapòna kuumukila pamutù pàà cisàsà aci, e kudikùmayè panshì, anyi, kuumukila mu mùsongà wà nzùbu aku, kudikùmayè panshì.

¹⁴ Kuyiishayè Èvànjeeliyò mu mùshindù wà ne wàkiimana mu Boston, Massachusetts, mu kaadididiishì kàà kalòpòke mu cimano, bwalu kakùvwa èkèleeziyà nànsha umwe uvwa mwa kukùmbana musùmba wèndè awu to. Ne wàkiimana mwaba awu ne bukolè bwà dikèma, ne wàkayiisha ifernò mu mùshindù wà ne, bantu bàvwa bàkwàta mudimu ne bitungà mu mápà, bààkadishinda mu misèsù bèèla mbilà mikolè bàlòmba luse. Mu Bwikadi bwà Nzambi’s! Bayiishi banènè bàtù bamanyè, ku Diyì dyà Nzambi, mwà kutwadila batèèleji Bwikadi bwà Nzambi abu. Kabyènzekikù to bwà bantu bafwànyine kwikala bapapè munda mwa myoyi yàbò mu mùshindù wà kabàyikù mwà kujingulula Bwikadi bwa Nzambi to. Kabùikadikù nànu nànsha!

¹⁵ Muntu wa kumpàla, mmwenzè ànu wènza mpèkaatù ne mwenzè cintu kampànda cyà cibi, ne pàakabwelà Nzambi mu bwikadi bwèndè, anyi, pàakabwelayè yèyè mu Bwikadi bwà Nzambi: “Adàmà,” yèyè kàvwa mwà kwimana mu Bwikadi bwà Nzambi to. Wàkanyeema ne wàkasokoma mu kaacipuka ne wàkateeta bwà kudibwikila dibèji dyà mfigì, bwalu wàkamanya ne ùvwa mwimàne mu Bwikadi bwà Yehowàh, Mufùki awu.

Acì ncìvwà dibinduluka dyà muntu wa kumpàla, paanyimà pàà yèyè mumanè kwenza mpèkaatù ne muteetè bwà kubwela mu Bwikadi bwà Nzambì mwikàle ne mpèkaatù pa musùukà wèndè. Kàvwakù mwà kusokoma to, bwalu ùcìvwakù ne mwoyi mutekète. Mpèkaatù kàvwa mukwàte mùkaadiye mwelè miji mu myoyi yà bantu leelù ewu emu to, kàdi yèyè ùvwa mumanyè ànu menemene ne ùvwa mwimàne kumpàla kwà Mufùki wèndè. Mpindyewu, wàkasokoma mu bisuku ne kayi muswè kupàtukamù to, ne kàvwa mwà kupàtukamù to too ne pàakamulongolwelà Nzambì cintu kampànda.

¹⁶ Tudi bafwànyine kwalukila, ne kwangata mu Genèsè nshapità wa 17 ku mvensà mwi3 aku, pàvwà nkambwà munène awu, Abraham, pààkabwelàye mu Bwikadi bwà Nzambì, ne Nzambì kwakulaYè nendè (mu nshapità wa 17) mu Dìna dyà Nzambì wa Bukolè bwónsò, Abraham kupòna kutwà mpàlà panshì. Nkambwà munène awu, musadidi wa Nzambì, kàvwakù mufwànyine kwimana mu Bwikadi bwà Nzambì to, nànsha mùkaavwàye muMusadile munda mwà bidimu makùmi àbìdì ne bitaanu amu, ne lulumatu lwónsò. Kàdi pààkabwelà Nzambì mu bwikadi bwèndè, nkambwà awu wàkapòna kutwà mpàlà panshì bwalu kàvwa mufwànyine kwimana mu Bwikadi bwà Nzambì to.

¹⁷ Mu Ekèsòòdè 3, tudi tusangana ne Mòsà, musadidi munène ne mupròfetà wa Nzambì awu, pàvwàye mu ndekeelu mwà cipèèlà mwàmwa apu, muntu awu ùvwa muntu wa cijila. Ùvwa mulediibwe mu kiipàcilà aku. Ùvwa mulela kuumukila ànu munda mwà mamwèndè bwà kwikalayè mupròfetà. Wàkateeta bwà kupeta dilonga dyèndè dyà tùlaasà ne kwenza byónsò bìvwàye mwà kwenza bwà kusungila cisàmbà cyèndè, bwalu wàkumvwa ne yèyè nguwva ne cyà kusungila cisàmbà cyèndè, kàdi, mpàvwàye mucyũmwè ku mmwènenenu wa tèòlòjì. Ùvwa mulongèshiiibwe. Ùvwa mulongesha tùlaasà bilenga byà dikèma. Ùvwa mwà kulongesha beena Èjipitù lungènyi, bòbò bàvwà bantu bàà batàmbe kwikala bàà meeji matwè bàà pa buloba abu. Ùvwa mumanyè byónsò munda ne pambèlu. Ùvwa mumanyè Mifùndu kuumukila ku A too ne ku Z. Ùvwa mumanyè milayì yivwà Nzambì mufile. Ùvwa mubimanyinè ku mmwènenenu wa mamanya a mu mutù. Ne ùvwa muntu mu—munène mu maalu a búsàlaayi. Kàdi dīngà ditùkù lwà mu ndekeelu mwà cipèèlà mwàmwa, pààkabwelàye mu Bwikadi bwà Nzambì, wàkakòpola bisàbaatà ne wàkapòna panshì—ku makàsà èndè, mumanyè ne ùvwa ùsanganyiiibwa pa buloba bwà cijila. Kàvwa mwà kushààla mwimànyine kuulu to pààkabwelàye mu Bwikadi bwà Nzambì awu, wàkapòna kutwà mpàlà panshì mwàkenzà Abraham amu. Kàvwakù mwà kwimana kuulu mu Bwikadi bwà Nzambì to.

¹⁸ Mu Ekèsòòdè 19.19, pàvwà cisàmbà cisungula cyà Nzambì acì kubangila kale wàwa mu matùkù a Abraham, ku Abraham kulwakù Izàkà, ku Izàkà kulwakù Yakòbò, mu Yakòbò

kupàtukamù bankambwà, ne paanyimà pàà bidimu ne bidimu bantu bàà cijila kupàtukabò, bantu banène, cisàmbà cisungula, cisà cisungula, cisàmbà cijidila, cyà cijila, bàvwà basadile Nzambì mu nsòmbelu wabò. Nènku dīngà ditùkù Nzambì kwambaYè ne: “Sangishà Izalèèlà kaaba aka, Mèmè nēngàakulè naabò.”

¹⁹ Kàdi pààkatùulukà Nzambì pa lusongo lwà Mukùnà wà Sinaayi, ne mukùnà mujimà awu kukwàtawù kapyà, ne mwìshì wùvwa wùbùùkapù byenzè bu cikùtù cyà kapyà, ne Dìyì dyà Nzambì kukunguladì, Izalèèlà kupònabò kutwà mpàlà panshì e kwambabò ne: “Mòsà àkulè yèyè, kàdi kí n’Nzambì to, bwà katwikadi twálwa kufwà.” Muntu, mu Bwikadi bwà Nzambì, ùdi ùjingulula ne ùdi ngènzàmpèkààtù! Pààbò’s, yònsò wa kùdìbo, bàvwa batengula bilondèshile Mikenji. Bàvwa bakùmbàjè mèyì matùma ne bikwàbò byònsò, kàdi pààkaakulà Nzambì ne kuseemenabò mu Bwikadi Bwèndè, bààkajingulula ne kabàvwa cintu to, kabàvwa—kabàvwa bajaalàme to, kùvwa cintu kampàndà cìvwa cipangike, bwalu bàvwa mu Bwikadi bwà Nzambì. Eyowà. Ki kwambabò ne: “Mòsà àkulè yèyè, kàdi kí n’Nzambì to, bwalu Nzambì Yèyè mwakùle twètù bònsò netùfwe. Mòsà àkulè yèyè neetù.”

²⁰ Mùvwa mmu Luukà 5.8, pàvwà Peetèlò . . . kaa, pàvwàye muntu munènè wa mutù mukolè, ne muntu wa bwenzeji bunène, bukolè bunène mutùdì tuumvwa. Úvwa bu mpomba, mulòbi wa mishipa mumanya bimpè. Kàdi pààkamònàye cishimà cyà Nzambì cyenza kùdi Muntu ànu wetù wa pàtupù ewu, mùvwàbi bimwèke’s, bu mùvwàye mujingùlùle pa dībà adi ne bìvwa bikèngela kampànda wa mutàmbe muntu bwà kwela mishipa yònsò ayi mu bukòndò bùvwàye yèyè, ne dilonga dyèndè dyònsò dyà tulaasà, dimanya dyèndè dyà bulòbi adi, mulòbe naabù bufùkù bujimà abu kàyi mukwàte kantu to. Kàdi yèyè kuumvwa Muntu kampàndà wàmba ne: “Elà bukòndò bwèbè abu.”

²¹ Nènku pààkabangàye kukòka, kukwàtayè mishipa búngì cyanàànà, ki kufikayè ku dijingulula ne ùvwa muntu mubiipe. Kì yèyè ne: “Nguumùkilèku apa, Éyì Mukalenge, bwalu mèmè’s ndi muntu mubiipe.” Wàkamba aci nganyi? Peetèlò Munsantu’s, mu Bwikadi bwà Nzambì, ùlòmba Nzambì bwà kuumuka mu bwikadi bwèndè yèyè, bwalu wàkafika ku dijingulula ne ùvwa ngènzàmpèkààtù.

²² Abraham wàkajingulula mùvwàye yèyè mwinè “mupiile.” Adàmà wàkajingulula mùvwàye yèyè mwinè “mupiile,” pèndè mwànà wa Nzambì, kujingululayè mùvwàye yèyè mwinè “mupiile.” Mòsà wàkajingulula mùvwàye yèyè mwinè “mupiile.” Izalèèlà, bu èkèleeziyà ne ditunga, bààkajingulula mùvwàbo bòbò biinè “bapiile.” “Nguumùkilèku apa, bwalu ndi muntu mubiipe.” Yèyè kààkateeta kwamba ne: “Mpindyewu, mèmè ndi wa cijila ne mukùmbànyine kwakidila cyòci eci” to. Wàkamba ne: “Mèmè ndi muntu mubiipe.”

23 Musangu kampànda mulongi kampànda wa maalu a ntèndeleeleu muditu wa mènà, mwikàle ne tèlòlji yónsò uvwayè mwà kuyiila ku makàsà kwà mulongeshi munène kampànda uvwabò bàbìikila ne n'Gàmalièlè awu, dyèndè Shawulà wa ku Taashishi, utùdì bamanyè ne m'Pòlò awu, mutèndeleeedi wa mu ùmwè. Úvwa mumanyè kaalu kónsò kàà mu ntèndeleeleu wabò. Úvwa Mùfaalèsà wa ku Bàfaalàsà, ne mwena Ebèlù wa beena Ebèlù. Úvwa muntu mumanya bìmpè, mumanyi wa dibàla, wa meejì matwè, mudimùke, mulongè tùlaasà, wàmba mùvwàye mumanyè Nzambì kacya ku bwànà. Kàdì dínghà ditùkù mu njila mutàngile ku Damàsèkè, Dikunji dyà Kapyà adi dyàkamuteemena ne yèyè wàkadishinda ku èndè. . . ku makàsà èndè, panshì, mu lupwishi, ne wàkamba ne: “Mukalenge, Udi muswè bwà mèmè kwenza cinyi?” Dilongeshiibwa dyèndè dinène dyónsò adi, dilongeshiibwa dyèndè dinènè dyénsò dyà tèlòlji adi, kàlaasà kèndè kónsò kalonga aku kakààkiikalakù ne mushinga to pààkiimanàye mu Bwikadi bwà Nzambì.

24 Ndi njinga kwimanakù ndambù kaaba aka bwà kwamba ne ncintu cimwècimwè aci. Udi mufwànyine kwikala mupetè màpòlomè a D.D., Ph.D., cyónsò cyùdì mufwànyine kwikala aci, udi mufwànyine kwikala mùyaayàye mu èkèleeziyà kacya ànu ku bwànà, udi mufwànyine kwikala mwenze byenzi byónsò byà butèndeleeedi bìdikù abi, kàdì paùdì ànu ufika mu Bwikadi bwà Nzambì neudyùmwè mukesè ne kùyi ne mushinga to.

25 Pòlò wàkajingulula ne ùvwa mupìile, ne wàkadishinda panshì, ku bwenzeji ne Bukolè. Pàakabàndulukàye e kumòna Nzambì mwinè uvwayè ùyiisha awu, ne. . . ùlwisha, ne ùdyàmbidila mùvwàye mumanyè awu, ne kumònayè ne yèyè nguvwa mupìile, wàkadishinda panshì mu malaba, bwalu ùvwa mu Bwikadi bwà Nzambì. Wàkamòna Dikunji dyà Kapyà adi.

26 Kàdì bìshi bwà Yone Munsantu munène wa mu Bwàkabuulwibwà 1.7 awu, pàakamuleejàbo cikèenà-kumòna aci, ne kutàngilayè, ne kuumvwayè Dìyì dyàkula nendè? Ki kukùdimukayè bwà kumòna Dìyì adi, e kumònayè bitèekedi byà myèndù byà ngòlò mwandamutekète. Ne Kampànda ùvwa mwimàne munkaci mwà bitèekedi byà myèndù byà ngòlò mwandamutekète abi, ne nsùkì myenzè bu myòsà yà mùkòòkò, ne mèsù bu ndimì yà kapyà, makàsà bu makunji a cyamù cyà kabanda, Úvwa ne mukàbà wà ngòlò muswika pa cyàdì, ne Úvwa ùbìikidiibwa ne n'Dìyì dyà Nzambì. Kàdì pèndè Yone Munsantu munène awu's wàkendà ne Kilistò, kuMweyemena mu cyàdì, pààkenzàye bintu byónsò ebi! Mùngàmbì mu dindà emu ne, mudimu wà bwambi wà Pòlò wùvwa mutàmbe kule ne kule wà yónsò wà kùdibo. Mwaba ewu, paanyimà pàà Yone mumanè kwenda ne Yesù, mwakùle Nendè, mulààle pàmwè Nendè, mudyè Nendè, kàdì pààkaMumònàye mwimàne mwaba awu, mu ngiikàdilù mutùmbishiibwe awu, kwabayè ne wàkapòna

ku makàsà Èndè bu muntu mufwè. Amen. Anji elààyibì pèènú meeji pa bwalu abu!

²⁷ Tudi mwà kulwa mu èkèleeziyà ne kuyiikila ne kutùmbisha Nzambì, ne bikwàbò, kàdi, kaa, mwanèètù, patùdì tuMumòna ùlwa apa, cintu kampànda neciikale cishiilàngàne mu myoyi yètù! Tudi bafwànyine kwela meeji ne tudi tukùmbaja mudimu wètù wà butèndeledi mu kuya kwà mu èkèleeziyà ne kufuta kwà byàdiikùmi byètù. Tudi bafwànyine kwela meeji ne tudi tuneemekela mikenji yà èkèleeziyà ne twambulula ku mwoyi twitabàayi yònsò, kàdi twànji ànu tùMutàngilè musangu wùmwèpelè, cintu cyònsò nkòong cidi cishintuluka ku nseke yònsò. Eyowà's, ncyà bushùwà.

²⁸ Muntu munène ewu, Yone Munsantu, muntu munène mùshindù awu, Bible mmwambè mu Bwàkabuulwibwà 1.7 ne, “wàkadishinda byenzè bu ne ùvwa muntu mufwè.” Paanyimà pàà bidimu bisàtù ne citùpà byà bwobùmwe ne Kilistò, yèyè wàkalwa umwe wa ku bafùndì bàà Mikàndà mitùminangana ayi, mufùnde bwà bwalu Bwèndè, mudyè Nèndè ku mèèsà, mulààle pàmwe Nèndè mu bulààlù, ne mubwelè Nèndè mu bwobùmwe kwònsò kùvwàYe ùya, kàdi pàakakùdimukàye bwà kuMumòna, wàkashààla kàbìdì ne mwoyi munda mwèndè to. Wàkadishinda panshì bu muntu mufwè, anyi mu malaba. Èyo.

²⁹ Tudi tumòna Yeshàayi, mu Yeshàayi 6.5, bu mutwàfumu ku dibala, mupròfetà munène wa bukolè ewu, yèyè ngumwe wa ku bapròfetà bàà batàmbe bunène bàdiku mu Bible. Kùdì Mikàndà makùmi àsambòmbò ne yisambòmbò yà Bible; kùdì nshapità makùmi àsambòmbò ne yisambòmbò mu Yeshàayi. Yeshàayi ùdì ùbangila mu Genèsè, munkaci mwà Yeshàayi yèyè ùdì ùbweja Dipungila Dipyadipyà, ku ndekeelu wà Yeshàayi yèyè ùdì ùbweja Bukalenge bwà bidimu cinunu; ànu Genèsè, Dipungila Dipyadipyà, ne Bwàkabuulwibwà menemene. Bipwàngàne! Yeshàayi ùvwa umwe wa ku bapròfetà banène. Kàdi dīngà ditùkù yèyè ùvwa mweyèmene pa dibòkò dyà Uzìyà mfùmù munène awu, Uzìyà wàkuumushiiibwa kùdiye, ne yèyè wàkashààla ne dibungama. Ùvwa muntu mwìmpè be, ùvwa muntu mwìmpè ne mwakàme, piikalàbi ne mfùmù mwakàne awu (mfùmù mwìmpè) wàkajingulula ne ùvwa muntu wa cijila ne wàkamulama mu ntempèlù wèndè.

³⁰ Yeshàayi ùvwa ùmòna bikèèna-kumòna. Ùvwa mupròfetà. Yeshàayi ùvwa ùyiisha Díyi. Ùvwa mwambi. Yeshàayi ùvwa muntu wa cijila. Kàdi dīngà ditùkù, yèyè mwimàne mu ntempèlù, wàkabwela mu nyumà ne wàkamòna Butùmbì bwà Nzambì. Wàkamòna Banjèlo biikàle ne mapwàpwà majike kwìsù Kwàbò, mapwàpwà mabwikile pa makàsà Àbò, bàbùuka ne mapwàpwà, bèèla mbilà ne: “Wà cijila, wa cijila, wa cijila m’Mukalenge Nzambì wa Bukolè bwònsò!”

³¹ Mupròfetà awu wàkajingulula ne ùvwa cintu cyanaàna. Yèyè kwamba ne: “Dyàkabi dyànyi, bwalu ndi muntu wa mishikù mibiipe.” Mupròfetà, mupròfetà mutàmbe bukolè wa mu Bible, umwe wa kùdìbo. “Ndi muntu wa mishikù mibiipe, ne ndi musòmbèle munkaci mwà bantu bàà mishikù mibiipe. Dyakabi dyànyi, bwalu ngàmònu Butùmbi bwà Nzambi.”

³² Ne mmwambè ne, pàakeelà Mwanjèlo awu lubilà, “makunji a ntempèlù àkanyunga àtwa kumpalà àtwa paanyimà.” Mwanèètù, aci's necikuvwijè. . . Ki ng'anu makunji a ntempèlù ikalà mwà kunyunga to, kàdi mauu ònsò ne buloba nebinyukushibwè pàalwà Ye cyàkàbìdì. Mikùnà neyinyeemè, ne mbù neajiminè, ne neèlè lubilà lukolè ne: “Tùsokòkèku kumpalà kwà Ewu ùdi musòmbè pa Nkwasa wa butùmbi awu.” Neciikalè cikondo cyà cikwàcisha bwòwà. Ndi nkwabwila, wèwè mulundà wanyì ngènzàmpèkààtù, mbìmpè ùkenketè bwalu abu. Ncyà bushùwà.

³³ Mpindyewu, Yeshàayi wàkamba ne: “Dyàkabi dyànyi, ndi muntu wa mishikù mibiipe, ne ndi musòmbèle munkaci mwà bantu babiipe. Ne ndi, bantu aba bàdi ne mishikù mibiipe.”

³⁴ Mpindyewu vùlukàayi ne, piikalàbi ne bantu bàà cijila bàà mùshindù awu bààkajingulula mùvwàbo “bangènzàmpèkààtù” mu Bwikadi bwà Nzambi, ngènzàmpèkààtù ne udi kàyi ùneemeka Nzambi nebènzè cinyi mu Ditùkù adi? Bantu bàdi basòmbè mu masangisha aba nebènzè cinyi? Bantu bàdi bamòne Bukolè bwà Nzambi aba nebènzè cinyi, bàdi batèèlèje dibala dyà kwenda kupingana cyànyimà pa Dìyi aba, bàdi bamòne Nzambi ùDimwènesha, ne (kakùyi mpatà nànsha mikesè to) Mufùndù ne Mufùndù wònsò mùle, kàdi biikalè ànu bàteeta bwà kuya mu Dyulu kabayi balediibwe cyàkàbìdì ne bapetè Nyumà Mwìmpè aba? Bible mmwambè ne: “Biikalà muntu mwakàne ùsùngidiibwa ne lutàtù, ngènzàmpèkààtù ne udi kàyi ùneemeka Nzambi nebàshaadilè penyì?” Mmu mwaba wà mùshindù kaayi wutwikalà mwà kwimana patùdi tumòna Nzambi ùDisokolola kumpalà kwètù mene, ne tumòna Butùmbi bwà Nzambi ànu menemene mwàkamòna bantu abu amu, ne bantu bàà mùshindù awu bààkeela mbilà mikolè, bapròfetà ne beena meeji bàdi Dìyi dishindamijila pa bóbò abu? Piikalàbi ne bóbò abu bààkeela mbilà, ne kupòna panshi, ne bèela mbilà mikolè ne: “Ndi muntu wa mishikù mipangè cijila, yà bukooya,” nebìikalè cinyi dibà adi bwà muntu awu udi kàyi nànsha muswè kutonda mpèkaatù yèndè? Nebiikalè cinyi bwà nsongàalùmè anyi nsongàakàjì awu udi kàyi muswè kutonda mpèkaatù yèndè? Nebiikalè cinyi bwà muntu wa mwoyi wà cipàtu awu udi udyàmbidila mùdiye mumanyè bufùki bwà Nzambi kutàmba mùdi Nzambi Yèyè mwinè mumanyè awu? Cyènzekelà muntu awu ncinyi udi mupicishe matùkù èndè ònsò a mwoyi mwikalè ùteeta kujaadikilangana mùdi Bible wa mafi? Muntu awu neàshaadilè penyì? Anji elàayi meeji pa bwalu abu!

³⁵ Eci mbutangadiki. Eci ncikondo cyà kunyùkusha bantu. Eci ncikondo cyàkambà Nzambi ne nekùlwe cikondo, Yèyè wàkanyùkusha Mukùnà wa Sinaayi musangu kampànda kàdi kùlwalwa cyàkàbìdì dinyùkushiibwa, ne Yèyè “kayi ùnyùkusha ànu Mukùnà wà Sinaayi to, kàdi Yèyè neànyukushè byònsò bìdì bifwànyine kutentemunyiibwa.” Kàdi nuvwakù bamòne cikwàbò citùpà cyà Mufundu awu aci anyi? “Kàdi twètù tudi tupeta Bukalenge bìdì kabùyì mwà kunyungishiibwa nànsha!” Àlèluuyàh! Byònsò bìdì mwà kunyungishiibwa nebinyukushiibwè. Maulu neànyukushiibwè. Buloba nebùzakalè. “Maulu ne buloba nebijiminè, kàdi Diyì adi kadyàdyàkujiminakù to. Bwalu pa lubwebwe elu Nèngìbakilèpu Èkèleeziyà Wanyi, ne biibi byà ifernò kabyàkuMutàmbakù bukolè to.” Byònsò bìdì mwà kunyùkushiibwa nebinyukushiibwè. Kàdi twètù tudi tupeta Bukalenge bìdì Diyì dyà Nzambi Yèyè mwinè, ne Nzambi ùdi Diyì Dyèndè. Kèna ùDinyùkusha Yèyè mwinè to. Amen! Kaa, ekèlekèlè! “Kàdi twètù tudi tupeta Bukalenge bìdì kabùyì mwà kunyungishiibwa nànsha,” kabùyì mwà kunyukushiibwa to, mùdì Pòlò mufùndì wa Ebèlù awu mwambè.

³⁶ Muntu wa mùshindù awu ne mulùme wa mùshindù awu, cikondo cyà mùshindù awu ne mùshindù mwinè wàkadyùmvwàbò's wè! Tudi kàbìdì, twètù biinè, tudi badimwène Butùmbì bwà Nzambi ànu mwàkadimwènà bantu aba amu. Bushùwà's. Tukàadi baBùmòne. Tudi bamòne Butùmbì bwà Nzambi ànu mwàkaBùmònà Abraham amu. Tudi bamòne Butùmbì bwà Nzambi ànu mwàkaBùmònà Mòsa amu, Nzunji dyà Kapyà dimwèdimwè adi, Bukolè bùmwebùmwe bwà Nzambi abu, Kilistò umwèumwè udi-. . . udibuulula Yèyè mwinè awu, ùdileeja Yèyè mwinè, ùshààla mukwàte ku Diyì Dyèndè mu ditùkù dyà ndekeelu. Mmunyì mutùdìku dìbà adi mwà kulwa kaaba aka, ne kwenda ne kuDyàngata ne mapepelela nànkù awu? Mmunyì mutùdìku mwà kwendakana eku ne eku bashààle kacya twakwàta ku twitabàayi yètù ne màngumba ètù, katùyì twangata Diyì dyà Nzambi? Nebiikalè cinyì bwètù twètù mu Ditùkù adi? Nebyènzèkè munyì bwètù twètù, patùdì bamòne Butùmbì bwà Nzambi?

³⁷ Bàmwè bantu bàdi biimanyina pa bule biikàle bàBwèlulwila, bàmwè bàBùseka, bàmwè bàdi bàBùbiikilè ne ndikolesha dyà maalu, bàmwè bàBùbiikila ne ndubùkù, bàmwè bàBùbiikila ne m'Beelèzèbùlà, bàmwè bàBùbiikila ne ncikampànda anyi ncikansanga. Mùdì nsumwinu yà kale myambè ne: “Bakùtākàne nebèndelè ne bisàbaatà byasa misonso muntàku mwaba wùdì Banjèlò bàcìina bwà kudyata.” Ncyà bushùwà's. “Mukùtākàne mmwambè munda mwà mwoyi wèndè ne: ‘Kàkùtùkù Nzambi to.’” Pàdiye ùmòna Nzambi mumwènèshiibwe ànu menemene ku Diyì Dyèndè Sungasunga (kakùyì ku twitabàayi kampànda to; kàdi ku Diyì Dyèndè),

kàdi díbà adi yéyè ùDidyatakaja ku makàsà ne ùDyèlulwila, s'mmukùtākàne. Bwalu, bidi ne, Nzambi ùdi Díyì, ne Nzambi mmuDivwìjè kùdìye mutòòke tòò, kàdi yéyè “mmukùtākàne,” mùdi Bible mwambè. Nebiikalè cinyi bwèndè yéyè pàakèngelàbi bwà kwimanayè mu mwaba awu? S'nebiikalè—s'nebiikalè bibi be bwà muntu awu mu Ditùkù adi, udi kàyì ùneemeka Nzambi awu.

³⁸ Bangènzàmpèkààtù bàdi banyingàlále kaayi, bóbò, kabèèna ne bwòwà nànsha bukesè to. Kaa, to. Ngènzàmpèkààtù wányingalala awu, yéyè mmumanyè ne kùdi Mulàmbù wa mashi mwindile, bwà kwangatawù kaaba kèndè. Ki cidi cimpèèsha mèmè busàmbi ncyòci aci. Mèmè nkààdi mumòne butùmbi bwà Nzambi. Nkààdi muumvwè bukolè Bwèndè. Ndi mumanyè dindenga dyà cyanza Cyèndè. Ndi mumanyè dindenga dyà dinyooka Dyèndè. Ndi mumanyè ne Yéyè ùdi Nzambi. Ne ndi mumanyè ne ndi mucimùnyìibwe, kàdi kùdi Kampànda mwimàne mwaba awu pa kaaba kàànyì. Amen. Kùdi Kampànda udi mwimàne mwaba awu wàmba ne: “Taatù, elà bubì bwèndè bwònsò abu pambidi Pàànyì, bwalu yéyè wàkangata kaaba Kàànyì pa buloba.” Àlèluuyàh! Díbà adi ndi nya ku Nkwasa wa butùmbi wa Nzambi, ne dikima dyònsò, mwikàle ne ngàsà mu mwoyi wànyì, bwà kumanya ne kí nku byenzedi bìmpè to, kàdi nku luse Lwèndè kùndi musùngìdìibwe. Kí ncindi mèmè mufwànyine kwenza, cìndi mufwànyine kashààla wa ku cyòci, kí ncìndi mufwànyine kwamba to; kàdi nku ngàsà Wèndè kùdiYe munsùngile.

³⁹ Kabyèna bikèmesha to pàvwà mwedi wa kasàlà wàkabàkula aci awu, mwelè lubilà lukolè ne: “Ngàsà udi ukèmesha, díyì dipòle kaayi, dyàkasùngilà mukèngeledi wa luse bu mèmè. Kale wàwa mvwa mujìmine, kàdi mpindyewu ngààpetèki; mpofò, kàdi mpindyewu ndi mmòna.”

⁴⁰ Mmuniyì mùndiku mwà kuya mu Dyulu? Mmuniyì mùdiku mufwànyine kuya mu Dyulu? Katwèna mwà kucyènzakù to, twètù aba, ne kakwèna mùshindù wà twètù kucyènza to. Kàdi kùdi Kampànda wàkasebela njila. Ne Yéyè ngudi Njila awu. Kàdi mmuniyì mutùdi tufika kùdiYe? Ku Nyumà umwe, Nyumà Wèndè, nkutùdi babàtìijìibwe mu Mubidi wùmwe wàbìishiiwà ku lufù bu mpoko. Netùpatukè mu buloba bu babàndì bàà mu mabùlùngà bàà ditùkù dyà ndekeelu edi mu diitabuuja dyà Nzambi. Amen. Bushùwà's. Bangènzàmpèkààtù bàdi banyingàlále kabèèna ne bwalu bwà kulubakaja meeji to, Kampànda ùdikù pa kaaba kààbò.

⁴¹ Kaa, díbà adi paanyimà pàà twètù bamanè kubwela mu Bwikadi Bwèndè mpindyewu, ne bamanyè ne tuvwa mu Bwikadi Bwèndè, tudi baMumòne wènza bintu byàkènzàYe pàvwàYe pa buloba apa. Mmuniyì mùdi umanya. . . Mmuniyì mùdi umanya ne cyùdi mutàngile aci mmwonjì wà mvinyò? Mbwà mamuma àdiwu wùkwàma. Mmuniyì mùdi umanya èkèleeziyà ùdi uyamù

awu? Nku mamuma àdiye ùkwàma. Yesù wàkamba ne: “Ewu udi ungiitabuuja Mémè, byenzedi biNdi ngenza yèyè neàbyénze pèndè. Bimanyinu ebi nebifilè bàdi bìitabuuja.”

⁴² Mpindyewu, tudi tumòna ne Yèyè kààkatùtùminakù díyì bwà kuya kenza màngumba to. Kààkatùtùminakù díyì bwà kuya kenza twìtabàayi to. Kàdi Wàkatùdìmwija ku byà nànkù. “Bwalu ewu yònsò wadìdinga kuumushilaKù kantu anyì kuKùsàkidila kantu awu, cintu cimwècimwè aci necyùmushiibwè, cyàbò citùpà, ku Mukàndà wà Mwoyi.” Nwamònu anyì?

⁴³ Nènku, twètù katwèna ne díyì ditùtùmina dyà kwenza cintu nànsha cimwè to ànu kushààla ne Díyì adi. Nènku muntu yèyè mutùmiibwe kùdi Nzambì, neàshaalè ne Díyì, bwalu Nzambì ùdi mwà kutùmangana ànu ku Díyì Dyèndè. Nwamònu anyì? Nwamònu’s, Yèyè udi ne cyà kushààla ku luseke lwà Díyì Dyèndè. Dìbà adi patùdi tubwela mu Bwikadi Bwèndè, pàdi ànu muntu ùbwela mu Bwikadi bwà Nzambì, yèyè mmushintùlùke kashidi, piikalàbi ne kùdikù dishintuluka kampàndà kùdiye aku. Mpindyewu, kùdi aba bàdi bafwànyine kubwela mu Bwikadi bwà Nzambì kàdi kabàyi bàtèyaKù ntèmà to. Awu kàvwa mulongolwela Mwoyi to. Kàdi yèyè mudyànjila kulongolola kùdi Nzambì, pàdi ànu kaamuswakeenu kàà kumpàla aku kàmulenga, yèyè ùdi ùkàmanya. Aci cidi cyumba cikwàta kapyà.

⁴⁴ Tàngilaayi ndumbà mukèsè awu kuntu kwaka ditùkù adi ku Sàmaalèyà, mukàji awu. Ùvwa mu mshindù mubì mu meeji ne mu mubidi. Aci tudi bamanyè. Kàdi mmwenzè ànu ùmòna cimanyinu aci cyènjiibwa, cyà Maasiyà aci, yèyè ne: “Twètù tudi bamanyè ne Maasiyà ngulwàlwa bwà kwenza eci. Wèwè udi ne cyà kwikala mupròfètà Wèndè.”

Yèyè ne: “Mémè ki Maasiyà wàkafùndabò ne neàlwe awu.”

⁴⁵ Kucijingululayè. Kààkeelakù lukwàbò lukonko nànsha. Kubangayè ne lùkàsà lwònsò kwambula bujitu bwèndè, bwà kumanya ne piikalàbi ne yèyè ùvwa mupetè aci ne mubwelè mu Bwikadi bwà Nzambì, ùvwa mwambulè bujitu bwà kwambila muntu mukwàbò bwalu abu. Àlèluuyàh! Cyà bushùwà’s. Muntu kanà yònsò ewu udi ubwela mu Bwikadi bwà Nzambì mmwambulè bujitu kumpàlà kwà Nzambì, kubangila ànu mu kasunsa aku, bwà kwambila mukwàbò muntu. Tàngilàayi Abraham, tàngilàayi Mòsà, tàngilàayi Peetèlò, tàngilàayi Pòlò. Dìbà dyàkabwelàbo mu Bwikadi bwà Nzambì, bààkadìjingulula bòbò biinè ne “mbangènzàmpèkààtù,” ne bààkatwà citampì ku bujaadiki bwàbò ne mwoyi wàbò. Tàngilàayi inàbànzà mukèsè awu, kàvwakù mwà kushààla kàbìdì ntàntà mule to, wàkaya mu cimenga e kwambila bantu balùme abu ne: “Lwàyi, kanùmonàayi Muntu wàngambidì bintu bìndì mwenzè. Ewu kí m’Maasiyà awu anyì?” Kabàvwakù mwà kuCìvila to, bwalu

Civwa cyà mu Mifundu. Bushùwà's. Èyowà, bàdi ne cyà kwenza nàнку, muntu mulùme, patùdi tupeta bujitu bwà dyambula bwà kwambila bakwàbò mwàkenzà Mòsà amu, mwàkenzà Peetèlò amu, mwàkenzà Pòlò amu. Paanyimà pàà maalu aa, wèwè waCimònu ne wàbwedì mu Bwikadi Bwèndè, wèwè udi mwambùle bujitu bwà Mukenji bwà wùfikè kùdi mukwàbò muntu. Kwèna ànu mwà kushààla mubùcike naaWù matàma to. Udi ne cyà kuWùfikisha kùdi mukwàbò muntu.

⁴⁶ Ndi mvùluka mwanèètù wa bakàji mukùlàkàji kampànda uvwa mwab'ewu kale wàwa, mamwèndè wa Mwanètù Graham Snelling, ùvwa ne ciibidilu cyà kusòmba ànu mu èkèleeziyà emu mene, ne ùvwa wimba ne: "Ndi mfùma ku dicimuna! Ndi mu lubilu, mu lubilu, mu lubilu, ne mfùma ku dicimuna, ne ncyèna mwà kushààla musòmbè to." Ùvwa ùfùma ku dipeta cintu kampànda. Mvwa muyè ku kaèkèleeziyà kakesè kàà bafiike lwà mu Louisville emu, ne bwònsò bwàbò bàvwa biimanyine kuulu, bimba ne: "Ndi nyeema mbànda ne Cibeeba cyà Mfùmù, ndi mfùma ku diCìpeta, ne mudìtwe mu Cibeeba aci!"

⁴⁷ Kùdi cintu kampànda pa bwalu abu, pàudi upeta Kilistò, kwèna mwà kushààlakù kàbidì mupùwe to. Matùkù èbè ònsò a mwoyi udi muntu mushintùlùke, bwalu pàdi mwoyi ne Mwoyi bìdisanga, bìdi byèza Bukènkè bukolè. Bulelèlà. Pàdi mwèndù wà nzembu ùtwàngana ne nshinga wà nzembu, wòwò mwikàle mwèndù wà cyà bushùwà, wùdi ne cyà kufila bukènkè; pàdi nzembu ne mwèndù awu bìpetangana, kawèna ne cyà dyenza to ànu kutangalaja bukènkè. Bùdiwu naabù nkwenza nàнку. Ne pàdi mulùme anyì mukàji mudyànjila kulongolwela Mwoyi wà Cyendèlèlè, ne ùmòna mùdi nzembu yà Nzambì yibàkula mwèndù awu, newùtumè Bukènkè myaba yònsò yìdiwu mwà kutùma ayi. Wèwè udi mufwànyine kwikala kùyi mupite pa watts dikùmi to, kàdi neùtangalajè Bukènkè bwònsò bùdi naabù abu. Wèwè kùyi wa watts nkàmà yitaanu to, tangalàjà Bukènkè bwà watts dikùmi. Fila wèwè ànu Bukènkè bwèbè abu! "Bukènkè bwènu bùkenkeshè kumpàlà kwà bantu, bwà bàmonè byenzedi byènu bìmpè ne bàtumbishè Taatù udi mu Dyulu." Èyowà's, mukalenge.

⁴⁸ Pàdi muntu ùtwàngana ne Nzambì, ùdi ùdijingulula ne "kèna mwìmpè to." Mmunyì mùdiku muntu mwà kutwà eku kutwà eku ùditàmbisha mùdiye munènè ne byònsò bikaadiye mwenzè, pèndè cintu cyaanàna? Kèna ne bwà nsongo to twamb'eku twamb'eku. Dingà ditùkù mu Memphis, mu Tennessee, anyì mu wùmwe... Ncyèna ngeela meeji ne mùvwa mmu Memphis to. Wùvwa ngùmwe wà ku myaba ayi. Tuvwa ne Mwanèètù Davis ne tuvwa twenza di—ditàbuluja. Mùvwa mufwànyine kwikala mu Memphis. Nènku tuvwa, tuvwa bayè ku cipalu kampànda cyà manàyi, ne bavwamù ne, kacivwa cipalu cyà manàyi to, civwa bu nzùbù wa dilongeshilangana bingoma nàнку awu, nènku bàvwa ne

mpi—mpingù minène yìvwàbo naayi mifùmìne ku bitùpà bishiilèshiiàngànè byà buloba, yà mishiilèshiiàngànè, ba-Hercules ne bakwàbò, yìvwà bazòdi banènè bàà bimfwànyì bazòle. Ki pashiishe kwenzabò ditaata dyà muntu uvwa ne bujitu bwà kilò makùmi àsambòmbò ne mwandamukùlù. Nudi bamanyè mùdi bwalu anyi, yèyè ùvwa ne mushinga kaayi? Tuumeeyà makùmi mwandamukùlù ne tùnaayi. Ki cyònsò cidiye. Tuumeeyà makùmi mwandamukùlù ne tùnaayi ki mushindà wònsò—wònsò wùdiku mwà kupeta mu yèyè. Ùdi ànu ne lupèmbà lutòòke búngì bukùmbàne bwà kumyamina mu ciswa cyà nzòlò, ne ùdi ne búngì bukùmbàne, ànu ndambù mukesè cyanàànà wa kàlisiyumù, ne tuubinshidimba tukesè. Twònsò atu ntufwànyine kusùmbishiibwa ku tuumeeyà makùmi mwandamukùlù ne tùnaayi. Kàdi twètù tudi tukùba ànu tuumeeyà makùmi mwandamukùlù ne tùnaayi atu ne tutwèngeleka's.

⁴⁹ Kùvwa nsongààlùmè yìbìdi miimàne mwaba awu, ewu kutàngilayè mukwèndè, kwamba ne: “Jim, katwèna ne mushinga mwìnè to, s'mmwòmò's?”

Awu ne: “Wà kwèpi's, katwèna naawù to, John wa yààya.”

⁵⁰ Mémè kwamba ne: “Kàdi anjì indilaayi kakesè, nwènu nsongààlùmè, wèwè's udi ne musùkà munda amu wùdi ne mushinga wà malaba binunu dikùmi, wùdi, wùdi mwà kupikudiibwa ku bukòlè bwà Nzambi, bu wèwè ànu mwà kubùlekela.”

⁵¹ Muntu, pàdiye ùmòna bintu ebi, mmwambùle bujitu bwà kwambila bakwàbò. Mémè ngákacimòna pàncìvwà ànu mwànà mutekète. Ntu mupìcishilekù mwoyi wanyì mujimà. Ndi nyingalala mùndi naawù ànu wùmwèpelè, ndi njinga bwà ngìkalakù naayi binunu dikùmi's. Bu ne mvwakù ne Cyendèlèlèlè, mvwa mufwànyine kwikala ànu ncyàmbila bantu, bwalu ki cintu cyà citàmbe bunène cìndiku mupetè. Bu nwènu mwà kubala mu Yèhezèkèlè 33, nshapità wa 33 wa Yèhezèkèlè, kùvwa nsentedi uvwa musòmbe pa cibùmbà, ne nsentedi awu ùvwa mwambùle bujitu bwà cimenga cijimà aci. Amen. Mpindyewu, tàbulukàayi, ditàbùlùjaayi nwènu biinè ku kondò kèènu kàà mwoyi kàà nyumà bwà katancì kakesè aka, pàndi mfika ku Mufundu ewu apa. Bìvwa bìkèngela bwà nsentedi awu kwikalayè muntu mulongesha. Bìvwa bìkèngela kwikalayè kumanyè cìvwayè wènta, bwalu mu ntàntà kanà yònsò, pàvwàbo ànu ne bàjuukù, mwena lukunà awu's, yèyè mufwànyine kucitandula. Ùvwa mufwànyine kumanya mùshindù wàbò wà dyenda, ùvwa mufwànyine kumanya diikala dyàbò, ùvwa mufwànyine kumanya ndongamu wabò ne milongo yàbò. Ntàntà yònsò uvwa mèsù a muntu mwà kumòna awu, yèyè ùvwa mufwànyine kucimòna. Ne yèyè ùvwa mutùmbùke kutàmbe bakwàbò bantu, bwalu ùvwa mulongesha bwà kumanya mwena lukunà awu. Ne

Nzambì ùvwa ùlòmba cimenga cijimà aci ku cyanza cyèndè. “Nsentedi, udi wamba bishi bwà bufuku?” Àlèluuyàh!

⁵² Mùshindù awu ngùdi màsàlaayi a Nzambì leelù ewu. Mmalongeshiibwe ku Dìyi. Pàdi ní ncinyi ní ncinyi cidi ne ndambù wa kapelu cijuuka, ciikàle ne cintu ckwàbò kampànda cyà kaciyi cyà mu Mifundu, yèyè ùdi ùdìmwija disangisha dyèndè. Cintu kanà cyònsò cidi kaciyi cyà mu Bible to, cintu kanà cyònsò cidi kaciyi—cidi kaciyi ne mmwènekèlu wa Nzambì, bu mùdi kudyà kwà byàkudyà byà nsupù, maja, ne bikwàbò byònsò, bwà kufuta mpaasàtà. Bintu abi mbibi. Manàyi a mubèlè ne manàyi a twartà mu maèkèleeziyà, mbibi! Nènku nsentedi mulelèlè pa cimanu, ukààdikù mufikè mu Bwikadi bwà Nzambì awu. . . Yèyè kàyi pa cimanu to, piikalàye ànu ne mbamanyè ne yèyè ùdi pa cimanu, cimanu cidi mwà kubènga kwikala citumbùke kutàmba bakwàbò beena disangisha. Kàdi yèyè mwikàle nsentedi mujaalàme, Nzambì ùdi ùmubàndisha too ne mu bipaapu mùdi bakwàbò kabàyikù mwà kufika to. Kàdi yèyè ùdi ùtàngila cisumbù cyà mikòòkò, ne Nzambì ùdi ùcilomba kùdiye yèyè! Mulùme wa Nzambì udi wimana mu Bwikadi bwà Nzambì, ne mumanyè ne Nzambì ùdi Nzambì, ne mumanyè ne Nzambì ùtu ùshààla mukwàte ku Dìyi Dyèndè, ne ùtàngila mùdi Nzambì ùDìkwàcila ne ùDyènzela mudimu ne ùshààla mukwàte ku Dìyi Dyèndè, díbà adi nànsha malongolodi anyi màngumba búngi kaayi àteeta bwà kuCyùpula, yèyè mmumanyè ndongamu ne milongo yà mwena lukunà awu. Amen. Yèyè mmumanyè cyà kwambila disangisha, nsentedi mulelèlè awu.

⁵³ Twètù bajìkùle ne Yèyè ùdikù, biikàle mu Bwikadi Bwèndè, ne batondè mpèkaatù yètù, yòyi's yidi yikùpudiibwa mu mukànda wà civùlukilu Cyèndè. Kakwèna muntu nànsha umwe udi mwà kwenza aci to pa kuumusha Nzambì. Mpingewewu, wèwè udi mwà kungenzela cintu kampànda, nènkufwilè luse, kàdi nèngiikalè ncivùluka. Mèmè mukwenzèle wèwè cintu kampànda, udi mufwànyine kumfwila luse, kadi newikalè ucivùluka. Kàdi Nzambì ùdi mwà kucifwà luse ne kucipwa mwoyi. Elàayibi meeji ku bwalu abu, “kàyikù nànsha mene ùcivùluka to!” Amen. Aci cidi cyèza ne ndyũmvwèku bimpè. Pàdici kaciyikù nànsha mwà kuvùlukiibwa kàbidi to, cintu nànsha cimwè kacýèna mwà kucýèza to pa kuumusha Nzambì. Cintu nànsha cimwè kacýèna mwà kwenza aci to pa kuumusha Nzambì. Yèyè mmwambè ne neÀcìkupulè mu mukànda wèndè wà civùlukilu. Mèmè ncyèna mwà kucýèza to, wèwè kwèna mwà kucýèza to, bwalu tudi ànu ne tuubyumvwilu tukesè tùdi ne mikàlù etu. Kàdi Yèyè kèna ne mikàlù to, Nzambì awu, kakùyi mpatà to Yèyè ùdi mwà kupwà ne mwoyi ne cyàkenjiibwakù. Amen.

⁵⁴ Nsongàakàji kampànda wa citende mufùmìne ku èkèleeziyà wa ku musòkò, ne tatwèndè ùvwa muiyishi wa cyena-kale, mwedi wa mbilà, anyi cidimba cyà èkèleeziyà awu. Kì nsongàakàji ewu kumwangala kuya mu cimenga, kàdi

kubwelakananganayè bikolè ne bakàji bàà muntwamu, ne kushààlayè ùkaadi wènza maalu mùvwàbo bóbò bènza amu, ne myòdelè. Ki dîngà ditùkù kudyùmwayè bundù bwà papa wendè ne maman wendè bwà kulwabò, anyi tatwèndè's we, èyo, mamwèndè ùkaavwa mufwè. Pa nàнку mukùlumpè awu, cintu cimwèpelè cìvwàyekù mufwànyine kwenza, nkujuuka mu dinda, kudyà cyàkudyà cyèndè cyà mu dindà ne kwangata Bible ne kuMubala, ne kwela mbilà ne kusambila ditùkù dijimà, ne kunyeemakanangana eku ne eku mu cibambalu amu, ki nsongàakàji awu kuumvwayè bundù ndambù bwà cyôci aci. Ki dîbà adi—dîbà adi pàvwà dîbà dyònsò dyà bufùkù bujimà adi, yèyè ànu mutwè cyanza pa Bible anyi, ùvwa ùbanga kuMubala, ùvwa ùjuuka mu bulààlù, wèla lubilà ne: “Butùmbi kùdi Nzambi! Àlèluuyàh! Kaa, butùmbi kùdi Nzambi's wè!” Mwikàle ànu ùtwa mikùmà wèla mbilà cyàbibidì cijimà cyà bufùku.

⁵⁵ Kwenzekabi ne dîngà ditùkù ùvwa ne cyà kucyònkomojakù beena mu èkèleeziyà wabò ne kaafetè kakesè kàà cyayi mùtùbo bènza misangu yònsò amu, nudi bamanyè's, nènku kàvwa mumanyè cìvwàye mwà kwenza ne papa wendè awu to. Twamb'eku twamb'eku, yèyè awu's nguvwa papa wendè. Nènku kupàngadikayè bwà kumutèeka peewulu mu cisàsà, kwambayè ne: “Papa, kî mbîmpè wikalè mwaba wùdi bakàji aba to, s'mmwômò's?”

Yèyè ne: “To, ncyèna ngeela meeji ne ndi muswè kwikalapù to.”

⁵⁶ Yèyè ne: “Èè, netwikalè mwà kwakidila bakàji bàà mu èkèleeziyà kaaba aka leelù ewu, ne netwikalè mwà kwenza kaadisangisha kakesè, kaadisangisha kakesè kàà milòmbò. Pa nàнку ndi—ndi nkwambila's, papa, bwà cinyi kwènàku ànu ubànda mu cisàsà mwàmwa?”

Yèyè ne: “Ngeela meeji ne ànu aci ki cîngènzà.”

⁵⁷ Ki awu ne: “Wikalè ubala mukàndà mulenga ewu.” Ki kumupèeshayè mukàndà wà maalu a buloba. Kuumushayè Bible wendè awu kùdiye bwà wàshàalakù mupùwe. Nènku ùvwa mumanyè ne yèyè mubalè Bible, mòna's, ùvwa mufwànyine kuditwa mu dyenza dyà mutooyi bûngi cyanààna kuulu aku. Nènku ùvwa ànu kuulu aku kumutù kwabò, nudi bamanyè's, mwaba wùvwàbo bènzela kaafetè kààbò aku awu. Ki kumupèeshayè mukàndà wà maalu a buloba, kwambayè ne: “Ewu ngùdi mulenga. Ki wùvwà wùkèngela bwà wèwè kubala, papa, bwalu wùdi wùkwambila bulelèlà bwònsò pa bidì bitàngilà buloba.”

“Kaa,” mwàkambàye, “nèngùikalè ne disànkà dyà kubala abi.”

⁵⁸ Ki yèyè ne: “Mpindyewu bànda kuulu aku ùshaalèku mupùwe ànu menemene too ne pùùmukà bakàji aba, ne

pashiishe nêngiikalè. . . nètuulukè panshi ne dîbà adi udi mwà kwenza cyònsò cyùdi muswè.” Kwitabayè bwà kwenza nànkù. Ki kubàndayè pa cisàsà apu, kupàsòmbayè.

⁵⁹ Nènku bóbò bàvwa bònsò munkaci mwà kwenza kaafète kàà cyayi aku, nudi bamanyè's, bàyiikila pa *bikampànda ne bikansanga*, ne nutu ànu bamanyè mùtùbi byènzeka amu, bàpìcila mu cikondo cyònsò cyà dicyònkómoka aci. Kàdi lwà pa dîbà adi cintu kampànda e kusùulukaci peewulu apu, mikunda ne ditùpika, ne byà ku cimanu bimata. Mukùlumpè awu nguvwa unyeemakana ùbànda ùpweka pa cisàsà cijimà apu ne mwèndè mwònsò, ùtùpika ùya muulu wàlukila, wèla mbilà ne: “Butùmbi kùdi Nzambi! Butùmbi kùdi Nzambi's wè!” Bakàji abu kabàvwa bamanyè ne civwà cyènzèke kuulu aku ncinganyì to, ncinyì civwàbo naaci kuulu aku. Ki dyàkàmwè kutùulukayè panshi apu, ùlwapù ne dikànda ne mwèndè mwònsò.

Nsongàakàji awu kwambayè ne: “Papa, s'vwà mukupèeshe mukànda wà maalu a buloba bwà ùbalè.”

⁶⁰ Yèyè ne: “Èyowà, ndi mumanyè nànkù. Udi mumanyè's,” yèyè ne, “Mvwa mbala mu mukànda wà maalu a buloba ewu mwaba wùdi myaba mu mbù yidi kayiyi ne ndekeelu to.” Ki yèyè ne: “Mvwa mubalè mu Bible emu makèèlèlè awu, Yèyè mwambè ne mMwèlè mpèkaatù yànyì mu 'mbù wa cipwàmwòyi.' Butùmbi kùdi Nzambi's wè! . . . ? . . .” Yèyè ne: “Yìcidi ànu yènda yìya's. Kayèèna ne ndekeelu to, yidi ànu mitùngùnùke yènda yìya.” Ncyà bushùwà. Nènku ùvwa wèla mbilà bwà cyòci aci. Èè, ncyà bushùwà's.

⁶¹ Nzambi ùdi wèla mpèkaatù yètù mu mbù wa cipwàmwòyi, ùyikùpula, ne yidi ànu bu ne kacya kayitukù myènzèke to. Kaa, ekèlekèle! Dîbà adi tudi biimàne kuulu ku ngàsà wa Nzambi, ku Yesù Kilistò Mukalenge wetù, bakezùke ne bàà cijila, bàà cijila ànu mùvwàYe Yèyè amu, bwalu Yèyè kèna ùmmòna mèmè pàndi mfika kuntwaku to, Udi ùmòna Mwàn'Èndè Sungasunga awu. Mùshindù wùmwèpelè wùdiYekù mwà kumòna. . . kèna mwà kummònakù mèmè to, bwalu ndi munda mwà Mwàn'Èndè. Ne Yèyè ùdi ùmòna ànu Mwàn'Èndè awu. Abi kî mbilenga bilayà anyi? Kabyèna bikèngèla bwà twètù kwikala twèla kàbìdi meeji ku mpèkaatù to, yònsò mmiyè, yidi mwinshì mwà Mashì. Èyowà's, mukalenge. Katwèna ne cyà kutàcisha kàbìdi meeji pa bwalu abu to, yònsò mmyumusha, ne myumusha mu civùlukilu cyà Nzambi. Kacyèna nànsha ùyivùluka kàbìdi to.

⁶² Yeshàayi, mupròfetà wa bukolè awu, pàakatondàye mpèkaatù yèndè, wàkamba ne: “Dyàkabi dyànyì, bwalu ndi muntu wa mishikù mibiipe.” Mupròfetà! “Ndi muntu wa mishikù mibiipe, ne disangisha dyànyì ndikooyike.” Nwamònu anyi? “Bantu bândi nyiisha, mbakooyike. Mèmè ndi mukooyike. Nènku dyàkabi dyànyì. Kàdi ki musumbà wà Banjèlò ewu bàpwekà bàfuma mu Butùmbi bwà Nzambi, bàkùpa ma—matutu

paanyimà, ne ndi ntàngila muulu mmòna mùzàbì Wèndè mùje Dyulu dijimà. Ne ndi ntàngila Banjèlò bàtù kacya kabàyikù bamanyè ne mpèkaatù ncinyì abu. Kacya kabàvwakù nànsha bamanyè ne mpèkaatù ncinyì to, ne mwômò amu, mu Bwikadi bwà Nzambi amu, biikàle ne mapwâpwà àbìdì mabwikile kwìsù, bàvwa ne mapwâpwà àbìdì mabwikile makàsà, ne bàbùùka ne mapwâpwà àbìdì, ne bàdi bèèla mbilà muunyà ne bufùku ne: ‘Wa cijila, wa cijila, wa cijila m’Mukalenge Nzambi.’” Yoyòyò. Aci’s ncifwànyine kukufikisha ku didyùmvwa ànu bu udi kùyi wa cijila, kí mmwômò anyì? Mpindyewu, cyàkenzàye ncinyì? Wàkamba ne: “Dyàkabi dyànyì.”

⁶³ Kàdi pàakatondàye mpèkaatù yèndè ne kwamba ne “dyàkabi dyànyì,” Mwànjàlò wàkaya kangata lukwàtù, kwambula dikàlà dyà mudilu divwà dileejà Nyumà Mwimpè ne Kapyà, ne wàkalwa ne wàkaditèèka pa mishikù yà mupròfeta, wàmba ne: “Nyawù Ngààkukezùlù.” Dìbà adi mapwâpwà awu àtuuta *nùnkù* ewu, kuumushawù ridô yà cikondo, kí kuumvwayè Nzambi wàmba ne: “Wàya kaaba Kèètù nganyi?”

⁶⁴ Kàdi paanyimà pàà yèyè mumanè kujandula ne kùvwa mùshindù wà kuumusha mpèkaatù, Nzambi ùvwa ùkèba bwà muntu kampànda kuyayè pa kaaba Kèndè, kí yèyè ne: “Mmémè ewu, ntùmaaku.” Ukaavwa mu Bwikadi bwà Nzambi, ne mumanè kutonda mpèkaatù yèndè, ne mukezùdiibwe ku mpèkaatù yèndè, ne mudìlongòlòle bwà mudimu. Amen.

⁶⁵ Mwedi wa kasàlà pàakabàkulàye cyòci aci, wàkamba ne:

Miliyò mpindyewu mu mpèkaatù ne bundù ki
kufwàbo eku,
Tèèlejà mwadi wàbò wà dibungama ne
kànjabàla;
Kolèshàku, mwanèètù, kolèshàku ùye
kabàsùngila;
Andàmùnàku ne lùkàsà lwònsò ne: “Mfùmù,
mmémè ewu.”

⁶⁶ Pàndi ngeela meeji ku Àfrikè, ku Inde, ne mu buloba bujimà, miliyò yà bampàngaanù bèèla mbilà mikolè bàdila myadi yà bàlòmba luse, kàdi wàya nganyi? Kí nkubàpèèsha kabèjì kàà kubala to, kàdi kubàtwàdila Yesù Kilistò. Muntu kampànda mu Bwikadi Bwèndè, bu Mòsà, uvwa mwà kuya kuntwaku ne kubàleeja disùngidiibwa dilelèlè. Kí nkubàfikisha ku diya kashàala bàà mu èkèleeziyà, anyì ku dilabulangana dyà ku cyanza ne dyambulula dyà twitabàayi to, kàdi kutwàdila musùkà wàbò disùngidiibwa; muntu kampànda mwimpè wa difwàna dyà Nzambi. Èyowà, Yeshàayi wàkatonda mpèkaatù yèndè ne wàkakezudiibwa.

⁶⁷ Paanyimà pàà Yakòbò mumanè kulwangana mvità yà bibùlà bufùku bujimà, mu kutonda kwà mpèkaatù yèndè, nudi bavùlùke mwaba wùvwàye ùsanganyiibwa awu anyì? Wùvwa

wùbiikidiibwa ne Peniel, P-e-n-i-t-e-l, Peniel. Mwakù *Peniel*, mu cyena Ebèlù, mbwena kwamba ne “mpàla wa Nzambi wa Bukolè bwònsò.” Yakòbò, kenji kàà maalu makònyàngàle kàvwà kànyeemà kwònsò. . . dìnà dyèndè divwa *Yakòbò*, mmùmwe ne “munyèngi wa myaba yà bendè,” mmumwè ne mudingyanganyi, ùvwa munyeemènyèeme matùkù èndè ónsò a mwoyi, ùnyeema Nzambi, kàdi musangu kampànda pààkabwelàye mu Bwikadi bwà Nzambi ku Peniel, ku mpàlà kwà Nzambi, wàkapyà Nzambi kàciyi muswè kuMulekelela to. Nzambi, bidì bitùkèngela ba-Yakòbò bakwàbò. Wàkanànkukila ku mpàlà kwà Nzambi, mu Bwikadi bwà Nzambi, wàkashààlamù too ne ku dipàtukà dyà dîbà. Nzambi kwambaYè ne: “Ndekèlè Nye, bwalu dîbà nya’ dikaadi dipàtuka.” Kàdi kushààlayè ku mpàlà kwà Nzambi too ne ku dipàtuka dyà dîbà, kàdi wàkuumuka mubingìshìibwe ne musùngìdiibwe. Huh.

⁶⁸ Kaa, cintu bunène kaayi civwàci’s wè, mpindyewu, cyà kumanya ne yèyè wàkalwangana mvità yà bibùlà too ne ku ndekeelu’s. Mbwena kwamba ne, ùkaavwa mumònemòne bimanyinu byà Nzambi, ùkaavwa mumònemòne Nzambi mu bilòtá, kàdi ewu musangu kaayi ùvwakù musangànyìibwe ku mpàlà kwà Nzambi, mu Bwikadi bwà Nzambi. Anji elàayibi meeji pa bwalu abu, nwènù balundà bàanyi. Mpindyewu, patùkaadi tulwijakaja apa. Mu Bwikadi bwà Nzambi, muntu mmushintùlùke. Yakòbò wàkashintuluka. Bwà mpindyewu kaayi ùvwakù mwà kwenda ne Nzambi. Èyowà’s, wàkalwa muntu mushiilàngàne ne uvwayè pààkayàye kuntwaku apu. Mvità mpindyewu yàkajika. Èyowà’s, mukalenge. Ki kubangayè kwibaka cyoshelu. Kàvwakù mwibidilàngàne ne diibaka dyà byoshelu to, nudi bamanyè’s. Kàdi, ndi nnwàmbila ne, paùdi ufika mu Bwikadi bwà Nzambi, udi ujinga kwibaka cyoshelu mwaba kampànda. Udi ujinga kupetakù mwaba kampànda wùdi mwà kusambidila. Yèyè wàkiibaka cyoshelu. Ùkaavwa mukezùdiibwe, ne Nzambi ùkaavwa mucimùne.

⁶⁹ Ne Yakòbò wàkashintuluka kuumuka ku *Yakòbò*, “munyèngi wa myaba yà bendè,” kuya ku *Izàlèèlà*, “mwànà wa mfùmù, mwikàle ne bukòokeshi pàmwe ne Nzambi.” Ki civwa cyenzèkèle Yakòbò ncyòci aci. Munyèngyanganyi wa myaba, mudingyanganyi, mubi, ukàyi cijila, mudingyanganyi, mudingè mwanààbò, mwibè bwanààbutè, mutùdi mwà kwamba, kùdi mwanààbò, mwangàte kaamùshindù kakesè kàà bukooyà kàà dicýenza, mudingyanganyi wa dikèma. Wàkadinga tatwèndè-mwenu. Kutèeka tuumici twà cilòmbàlòmbà e kwenza twànà twà ngombe twà makejimizeji, pàvwà ngombe ne difù yilwa mwab’awu, yikàtàngila kaamuci aku, ne mikòòkò. . . yivwa yimòna kaamuci kàà makejimizeji aku nènku yilela twànà twà makejimizeji, ùtùpèèsha makeji à cileledi. Mudingyanganyi, ùdinga tatwèndè-mwenu sungasunga. Mudingè mamwèndè, mudingè papa wèndè, mudingè mwanààbò, kàdi mmwenzè ànu

ùbwela mu...Yèyè ùwva mwenji wa maalu makònyàngàle. Ùwva ùnyeema myaba yònsò yivwàye ùya, misangu yònsò ànu ùnyeema Nzambi, ùwva munkaci mwà kunyeema mwanààbò. Kadi pààkabwelàye mu Bwikadi bwà Nzambi, wàkajingulula ne ùwva ngènzàmpèkàatù. Wàkenza cinyi? Wàkenza cinyi? Wàkamòna wèndè mpungà. Wàkatwilangana ne cintu cìvwàye kàyì nànsha mwelèlekù meeji kwònsò aku to, ne wàkashààla mwaba awu too ne pààkuumukà mpèkàatù yònsò kuyayi. Kaa, ekèlekè! Nzambi's wàkamupetela mu Bwikadi Bwèndè Sungasunga.

⁷⁰ Nzambi ùtu ùlongolola mùshindù wà kupetela bantu mu Bwikadi bwàbò, dìbà adi bàdi bàngata dipàngadika. Bàmwè bàà kùdìbo bàtu bàMunyeema, bàmwè bànyeemena kùdìYe. Bòbò badyànjila kulongolwela Mwoyi, bàvwà bàCìitabuuja, bàshààla bakwàteKù. Kabiyi nàнку to, bàdi bàteeta kuumuka bàmba ne: “KaCyèna ne bwà nsongo to.” Nwamònu anyi? Nènku ki muntu udi mujimìne nyèyè awu. “Muntu udi utonda mpèkàatù wèndè, neàfwidiibwè luse. Wèwè usokoka mpèkàatù webè, kwàkutantakù to.” To.

⁷¹ Ki Yakòbò pàvwàye, nudi bamanyè's, ditùkù dyà pààkacyàbu wàkatwilangana ne Esawù mwanààbò awu. Kàvwakù dijinga ne dikwàcisha dyà kùdiye dìbà adi to. Kàvwà dijinga ne bilwilu byèndè to. Ùwva mu mudimu wà diibaka dyà byoshelu. Kàcìvwà kàbìdì ne bwòwà bwà Esawù to.

⁷² Misambu 16.8, Davidi mmwambè ne: “Ndi mutèèke Mukalenge kumpàlà kwànyì.” Aci's ki cintu cìmpè cyà dyenza. Misambu 16.8: “Ndi mutèèke Mukalenge kumpàlà kwànyì.” Mùshindù awu, kàvwakù mufwànyine kupeta cibwejàkàjì pa bwalu abu to. Ùwva muswè kwikala mumanyè Bwikadi Bwèndè, nàнку Davidi wàkamba ne: “Ntu misangu yònsò ànu mutèèke Mukalenge kumpàlà kwànyì. Mpindyewu mèmè, Davidi, ndi mutèèke Mukalenge kumpàlà kwànyì, bwà kwikala misangu yònsò ànu mumanyè—mumanyè Bwikadi bwà Nzambi.” Aci kì ncìfwànyinèkù kwikala dìleesòna dìmpè bwètù bònsò dìlòlò edi anyi? Kwikala batèèke Mukalenge kumpàlà kwètù bwà twikalè bamanyè Bwikadi Bwèndè. Mutèèkè Yèyè kumpàla. Bwà cinyi? Mutèèkè Yèyè kumpàla, kumpàla kwèbè. Bwà cinyi? Dìbà adi kwàkwenza mpèkàatù to paùdì ùjingulula ne udi dìbà dyònsò ànu mu Bwikadi bwà Nzambi. Paùdì ùjingulula ne Nzambi ùdi mwaba apu, udi utàbaleela byùdì wamba.

⁷³ Muntu, pàdiye wèla meeji ne Nzambi mmuyè, neààkulè bwakùlavi, neààlakanè bakàjì, neènzè...neibè, neibilè, neàshimè. Neènzè nì cintu kanà cyònsò pàdiye wèla meeji ne Nzambi kèna ùmumòna to. Kàdi mubwejè mu Bwikadi bwà Nzambi, neàcilekèlè mpindyewu mene. Nwamònu anyi? Kàdi Davidi wàkamba ne: “Ntu misangu yònsò ànu mutèèke Mukalenge kumpàlà kwànyì.” Aci's ki cintu cìmpè. Kabyèna bikèmesha to pààkambà Nzambi ne yèyè ùwva muntu wa

pa mwoyi Wèndè Sungasunga. Muntu neénzè byònsò pàdiye wèla meeji ne Nzambi kèna pabwìpi apu to. Kàdi pàdiye ùjingulula ne Nzambi ùdi pabwìpi apu, nukààdikù kacya bamòne ngènzàmpèkààtù anyi? Muntu wa difwàna dyà Nzambi àdidingè àseemenè mwab'awu, yèyè's neàlekelè kwakula bwakùlavi, bwà yèyèku ne kaneemu kèètù aka. Nwamònu anyi? Kààkwenzakù minèkù yà bundù yìvwàye mufwànyine kwikala mwenzè ayi to. Nwamònu anyi? Nwamònu's, yèyè neàlekelè abi, bwalu mmumanyè ne ùdi mu Bwikadi bwà Nzambi, bwalu Nzambi mmusòmbèle mu nntètà wa cisàmbà Cyèndè. Nwamònu anyi?

⁷⁴ Paanyimà pàà Davidi mumanè kwenza cyòci eci, wàkamba ne: “Mwoyi wànyì newùcyonkomokè.” Mvw'a kujingakù bwà nwaçibala, Misambu 16. “Mwoyi wànyì newùcyonkomokè, ne mubidi wànyì newikishè mu ditèkemena.” Bwà cinyi? Mwoyi wànyì newùcyonkomokè bwalu ndi ne Nzambi kumpàlà kwànyì dîbà dyònsò. “Ne mubidi wànyì newikishè mu ditèkemena; mèmè mufwè, nèmbiishiibwè ku lufù. Bwalu Yèyè kàakwanyishakù to bwà Wa Cijila Wèndè àmonè dibola, anyi Kààkulekelakù musùukà Wèndè mu ifernò to.” Nwamònu anyi? Mpààkatèèkà Davidi Nzambi kumpàlà kwèndè, ne mwikàle mumanyè ne dîbà dyònsò ùvwa mu Bwikadi bwà Nzambi apu. “Anji kèbaayi dyàmbedi Bukalenge bwà Nzambi.”

⁷⁵ Tèèlejààyaaku mpindyewu, nwènu èkèleeziyà, ndi munùangè. Nènkù ndi muswè nùntèèlèjè mpindyewu. Ànu mùvwà Mwanèètù McCullough ne ciibidilu cyà kwamba ne: “Nyewù ngamba cintu.” Ikàlà misangu yònsò ànu mutèèke Mukalenge kumpàlà kwèbè, ne kwènjikù cintu nànsha cimwè cyùdi kùyi mufwànyine kwenza mu Bwikadi Bwèndè to, bwalu mMukutàngile. Nwamònu anyi? Mukalenge mmwasè citùùdilu cinyùngulùkile aba bàdi bàMuciina. Yèyè kèna... Yèyè ùdi ùshààla ànu pabwìpi neebè apu. Ne Yèyè mmumanyè byònsò byùdi wenza, ne wèwè udi ne cyà kujingulula cyòci aci. Paùkaadi ubanga kwamba mashimi, kùshimi nànsha, wavùluka ne, Nzambi mmukutèèlèje. Wèwè mubangè kwenza kaadiibila kakesè, kwibidi to, Nzambi ùdi ùkujooja. Wèwè mubangè kutèèla Dìna Dyèndè citèèlâtèèlè, kwènji nànkù to, Nzambi mmukutèèlèje. Wèwè mubangè kunwà mucì wà mfwankà, Yèyè mmukutàngile. Nwamònu anyi? Wèndè... Kale wàwa tuvwa twimba musambu wa ne: “Mu njila mujimà mutàngile ku cisòmbedi cilelèlè cyà musùukà, kùdi dîsù dîkujooja; cidya cyònsò cyùdi wela, dîsù dinène edi nditabàle, kùdi dîsù dîkujooja.” Vùlukà, enzà bu Davidi, tèeka misangu yònsò ànu Mukalenge kumpàlà kwèbè. Dîbà adi mwoyi wèbè newùcyonkomokè ne mubidi wèbè newikishè mu ditèkemena, bwalu Yèyè ngwàkacilaya. Èyowà's, mukalenge. Yèyè ùvwa mumanyè ne ùvwa mwà kubìika ku lufù bwalu Nzambi ngwàkacilaya. Èyo.

⁷⁶ Patùdì tubwela mu Bwikadi Bwèndè, tudi tushintuluka, katùciyikù mwà kwikala bàà mwomùmwè to. Tàngilàayi munda mwà bikondo byònsò, byà cipidi cyònsò cyà nsòmbelu, tàngilàayi bantu. Tàngilàayi Abraham. Wèwè udi wamba ne: “Èè, nsòmbelu mushintùlùke ùdi ànu bwà bambi.” Kaa, to. Nsòmbelu mushintùlùke mbwà bantu bònsò. Nwamònu anyi?

⁷⁷ Mpindyewu, Abraham ùvwa cidimè, kàdi pààkuumvwaye Dìyì dyà Nzambi dyakula nendè, ne kumònayè cikèènà-kumòna aci, wàkalwa muntu mushintùlùke kubangila ànu pa díbà adi. Wàkatàpuluka ne bàà mu cifuku cyèndè, ne beena dyèndè bònsò, ne wàkenda bu mwena lwendu ne mwenyi, mu buloba bwenyi, matùkù èndè ónsò a mwoyi, musòmbèle mu nntèntà, bwalu yèyè wàkajikula bitòòke tòò ne ùvwa wènda ùkebangana ne cimenga civwà Muciibaki ne Mucyènji mwikàle Nzambi. Ùvwa mumanyè ne kùvwa Nzambi, ne kùvwa cimenga mwaba kampànda civwà Muciibaki ne Mucyenji mwikàle Nzambi. Ki cìdì Ebèlù 11 ùtwàmbila ne, ùvwa wènda ùkebangana ne cimenga civwà Muciibaki ne Mucyènji mwikàle Nzambi. Ùvwa muntu mushintùlùke, pèndè's ùvwa ànu cidimè wetù wa pàtupù ewu. Kadi wàkamòna cikèènà-kumòna ne wàkabwela mu Bwikadi bwà Nzambi, ne wàkalwa muntu mushintùlùke kubangila ànu piinè apu.

⁷⁸ Mòsà, ùvwa mulami wa mikòòkò, kàdi wàkalwa muntu mushintùlùke pààkabwelàye mu Bwikadi bwà Nzambi. Ùvwa muntu mutulùmùke, ùvwa wènda ùnyeema Pàlò, ne cilwilu cijimà cyènda cilumbatangana nendè. Kàdi ne dikombo mu cyanza, wàkaalukila e kukwàtayè ditùngà dijimà. Nwamònu anyi? Bwà cinyi? Wàkabwela mu Bwikadi bwà Nzambi. Wàkalwa muntu mushintùlùke, mulami wa mikòòkò.

⁷⁹ Peetèlù, mulòbi, kàyi mumanyè cintu nànsha cimwè cyà bulòbi... anyi kàyi mumanyè cintu nànsha cimwè pa bìdì bitàngilà Nzambi to, cintu cimwèpelè civwàye pàmwàpa mumanyè civwa ànu mmwà kukwàta mishipa. Kàdi pààkabwelàye mu Bwikadi bwà Nzambi, ne kumòna Mufùki munène Uvwa mwà kufùka mishipa awu, pààkamwambilàYe bwà kwela makòndò bwà dikòkà dyà mishipa. Kakùvwa mishipa nànsha mikesè muntwamu to, yèyè wàkakòka ànu makòndò èndè cyanààna. Kàdi yèyè kwamba ne: “Ku Dìyì Dyèbè, Mukalenge. Ndi ngiatabuuja ne Wèwè udi Mwàna wa Nzambi, ne Wèwè mupwekeshe... mèmè mupwekeshe bukòndò, Wèwè ngwàngambìdì bwà kubùpwekesha; ku Dìyì Dyèbè, bwalu Wèwè ne Dìyì Dyèbè nudi cintu cimwè, ndi mpwekesha bukòndò.” Kàdi pààkabangàye kubùkòka anyi, wàkamba ne: “Seemènà kule, Mukalenge, mèmè ndi muntu mubiipe.” Nwamònu's, mulòbi, paanyimà pàà Peetèlò mumanè kutwilangana ne Kilistò yèyè kàcivwa kàbìdì wa mwomùmwè to. Yèyè, paanyimà, ùkaavwa ne lulamatu lwàbùngì kùdì Nzambi, mu mùshindù wà ne wàkapèèshiiibwa nsapì yà Bukalenge. Èyowà's, mukalenge.

⁸⁰ Pòlò, Mùfaalèsà muditu wa mènà, mulongè tùlaasà ne mulongesha mu ntèdeleelu yònsò wa...uvwakù pa buloba mu ditùkù adi awu, umwe wa ku bamanyi bàà mabàla bàà batàmbe kutùmbuka bàvwà bamanyike mu ditùnga. Kàdi dîngà ditùkù pàakafikàye kumpàlà kwà Dikunji dyà Kapyà adi, Nzambi uvwayè mukèngeshèkèngeshe awu, mu dipanga. Yèyè ùvwa Mùfaalèsà, kàvwa wìtabuuja ne Nzambi uvwa Muntu to. Ùvwa mumanyè ne Nzambi ùvwa Dikunji dyà Kapyà, Dyòdi ndyàkalombolà cisàmbà Cyèndè mu dipàtuka dyà mu Èjiipitù, nDivwà naabò mu lwendu lwònsò alu. Kàdi pàakamònàye Dikunji dyà Kapyà edi, wàkapòna kutwà mpàla panshi. Ki kuumvwayè Dìyì dyàmbe ne: “Shawùlà, udi uNkèngesha bwà cinyì?”

Yèyè ne: “Wèwè udi Nganyì, Mukalenge?”

Yèyè ne: “Ndi Yesù.”

⁸¹ Yèyè ùvwa muntu, mwinè wàkamba ne: “Nwàkabàtijiibwa bìshi?” awu. Ùkaavwa mu Bwikadi bwà Nzambi. Ùvwa muntu mushintùlùke kubangila ànu apu, ùkaavwa mu Bwikadi bwà Nzambi. Bùtu bùshintulula muntu’s.

⁸² Charles G. Finney, mwakwidyànganyi, mwakwidyànganyi munène wa mu Philadelphie, kàdi pàakabwelàye mu Bwikadi bwà Nzambi yèyè’s wàkalekelela dilonga dyèndè dyà mikenji adi panshi ne kushààla muyiishi mutàmbe kwikala wa bukolè uvwa ditùnga edi kadìyikù dyanjì kupeta to.

[Katùpà kàà mukàbà wà mèyì munda mutupù—Muf.]... ùvwa muyiishi, bwalu dîngà ditùkù wàkabwela mu Bwikadi bwà Nzambi. Kwelàye meeji, musangu kampànda ne, ùvwa mwà kulonga mudimu wà bwambi. S’nudi bamanyè mukàndà wèndè awu. Mèmè ndi ne mukàndà wèndè wà bwalu-bulonda bwà nsòmbelu wèndè. Kupàtukayè bwà kuya kasambila. Ùvwa wèla meeji ne ùvwa muyiishi. Ùvwa ne dijinga kampànda, dyà ne ùvwa muswè kuyiisha, ne kwangatayè ndambù wa mayiisha àvwàye mufwànyine kuteeta bwà kuyiisha. Kupàtukayè ditùkù kampànda, mu birò byèndè amu, bwà kuya kasambila, kuyayè mu diitu. Kutwàye binù paanyimà pàà mucì wà kale wùvwàbo buupùle, kùvwàye ùya mu mapingaja ónsò. Mutèndeledi wa dikèma, kàdi kàvwa mwitabùùje Cyòci aci to.

Kùvwa bakàji bàbìdì mu èkèleeziyà amu, bàvwà ànu bàmba ne: “Mukalenge Finney, tudi tusambila bwà ùpetè Nyumà Mwîmpè.”

Yèyè ne: “Mèmè’s ndi ne Nyumà Mwîmpè.” Yèyè ne: “S’ndi muyiishi.”

⁸³ Bòbò ne: “Mukalenge Finney, wèwè udi muntu munène, ne udi ne dishikuluja dyà Dìyì, kàdi bìdì bikukèngela Nyumà Mwîmpè. Twètù tudi tukusambidila.” Bakàji bakesè bàà kalolo.

⁸⁴ Ki kutungunukayè, ànu nàнку ànu nàнку. Nèнку ditùkù dyònsò divwàye ùpàtuka ùya paanyima pàà birò byèndè abi, mfumwèndè wa mudimu ne bantu bònsò bàà mùvwàye ùkwacila mudimu abu, yéyè ùvwa ùpàtuka mu birò byèndè ùya kuntwaku bwà kusambila. Ki dǐngà ditùkù yéyè kuntwaku munkaci mwà kusambila kàdi kuumvwayè cisuku cinyunga. Kwelayè meeji ne mfumwèndè wa mudimu awu nguvwa ulwa, wènda ùmukèba. Kukàtamukayè ne lukàsà lwònsò. Ùvwa munkaci mwà kwamba ne: “Mukalenge Nzambi, ndi muKwitàbùùje.” Kàdi cisuku pààkanyungàci, kwenzayè ne: “Uhm! Uhm! Uhm!” kujuuka kuulu kwamba, kukènzakana, bwà kumònà ne cívwa cinyungishe cisuku aci ncinyi. Nèнку dǐbà adi ki dyàkabwelàye mu Bwikadi bwà Nzambi. Kujingululayè ne cisuku aci cívwa cinyungè mu kiipàcilà kampànda. Kushààlayè mwimàne mwab’awu, binsònjì bìmupwekela pa matàma. Kwambayè ne: “Pàmwàpa bakàjì bàba mbabingè. Ndi ngumvwa bundù bwà muntu ùmmòna ngaakula ne Nzambi wanyi, kàdi pàanyi’s ndi mufwànyine kwela meeji ne bìvwa luumù bwà muntu ùmmòna nyiikila ne mfumwànyì wa mudimu. Mùshindù mwinè wùdì Mukalenge wanyi mutàmbe mfumwànyì wa mudimu ku bunène’s!” Kwambayè ne: “Mukalenge, mfwilèku luse ùnguuje ne Nyumà Mwìmpè,” ki kubangayè kutuuta mikòbolo ne kwela mbilà. Ùvwa mu Bwikadi bwà Nzambi. Kwasayè lubilu lukolè mutàngile mu cimenga ku birò byèndè. Wàkaditwa mu kwela kwà mbilà mikolè mu mùshindù wà ne wàkaya paanyimà pàà ciibi, kwambayè ne: “Mukalenge, nènKufwìshè bundù. Nsokòkèku paanyimà apa too ne pàngààjikijà dipaluka edi.” Bwà cinyi? Ùvwa mubwelè mu Bwikadi bwà Nzambi. Ùvwa muntu mushintùlùke. Mayiisha àvwàye ne ciibidilu cyà kuyiisha awu, wàkayiisha ànu mayiisha àmwèàmwè awu kàdi misùukà kulwayì ku cyoshelu. Nwamònu’s, ùvwa mu Bwikadi bwà Nzambi.

⁸⁵ Moody, mulongolodi mukesè wa bisàbaatà wa kale, kàyikù nànsha mumanyè ABC bìmpè to. Ncyà bushùwà. Wèndè mwakulu wùvwa mukwàte ne byà luse. Muntu kampana wàkangambila dǐngà ditùkù ne: “Wèbè mwakulu mmukwàte ne byà luse byenzè ne bibi’s, Mukalenge Moody.”

Yéyè ne: “Kadi’s nyewù mpeta naawù misùukà.” Pa nàнку. . .

⁸⁶ Dǐngà ditùkù bibèjibeji, mufùndi kuyayè bwà kafùnda cibèjibeji. Kuyayè kuntwaku bwà kumòna mùvwà muntu ewu mufwànyine kukwàta misùmbà yà bantu mu ngiikàdilù kanà yònsò, muntu mukesè, wa mutù dibàla, ne bikwàbò byònsò, ne mwikàle ne myedi milembèlèle too ne kwinsì, mwenzè kafù-dibùngù, ne ùvwa muntu wa mmwènekèlu wa wènza ne bwòwà pa kumutàngila. Pa nàнку cibèjibeji eci cyàkamwamba mambàvi, cyàmba ne: “Nànsha twamba mwinè ncyèna mmònakù cidì muntu mufwànyine kumòna mu Dwight

Moody to.” Yèyè ne: “Mmubì wa nkòtòòtò, dìyì dyèndè ndyà kaamwènzà, ùdi ne myedi mipwekè too ne mu cifùka, ùdi ne mutù dibàla ànu bu diwòji.” Ki yèyè ne: “Nànsha twamba mwinè mmunyi mùdìku muntu mufwànyìne kuya kamòna cintu kampànda mu Moody?”

⁸⁷ Ki kwenzekabì ne mulongolodi wa ndongamu wa Moody kucimònayè, kwambayè ne: “Tàngilà, Mukalenge Moody, ndi muswè nkubadilè eci nùku.” Moody kàvwa mumanyè mwà kudibadilaci to. Ki kwambayè ne: “Nènkubadilè mèyi a mufùndi.” Ki kucifùndayè.

⁸⁸ Moody kusàkayè ànu makaaya cyanààna, kwambayè ne: “Ncyà bushùwà ne kí mmémè to, bàdi bàlwa bwà kumòna Kilistò.” Ki cyònsò cìvwàku’s. Bwà cinyi? Ûvwa mu Bwikadi bwà Nzambì. Muumùke ku dilongolola dyà bidyacilu byà bisàbaatà, byà bantu kuvwàlabò; ùkaavwa ùvwàdika bantu Èvànjeeliyò wa didìlongolola. Bwà cinyi? Ûvwa mu Bwikadi bwà Nzambì. Cyà bushùwà’s.

⁸⁹ Mukàji mutekète musangu kampànda wàkalwa mu Bwikadi bwà Nzambì, mupìile ne mwèndè mwònsò. Mu katanci kakesè pààkajingululàye ne ùvwa mu Bwikadi bwà Nzambì, mpèkaatù ne mpèkaatù yònsò wàkafwidiibwa luse ne yèyè wàkalwa mukezùke ne mutòoke bu cilòngò cyà mbata. Kaa, ekèlekèle! Bùngì bwinè bwà bakwàbò bantu bàndì mufwànyìne kutèèla’s, kàdi díbà kí ndifwànyìne kukùmbana to.

⁹⁰ Kàdi ndi muswè kwakulakù ndambù bwànyì mèmè mwinè. Ncinyì cìvwàku cìfwànyìne kwikala cishààdile kuntàmba mèmè? Kùmvwà mèmè mpenyi? Mupàtùkile mu fàmiyè wa baakanwàyi, mupàtùkile mu fàmiyè wa bashebeyanganyi, mupàtùkile mu fàmiyè wa basùmbishi bàà mu musokoko bàà maalà a kapyà. Ne nwènu’s nudi bamanyè aci, yònsò wa kunùdi mmucimanyè, mumanyè ne nduumù kaayi lutùvwà twètù aba naalù muneemu emu. Bantu kabàvwakù bàtwàkwisha mu njila to. Mvwa nya mu ville, mbanga kwakulakù ne muntu, muntu nànsha umwe kàvwa ùngaakwishakù to ambà ànu muntu kàyi mwaba awu. Pàvwabo bàngaakwishwa, muntu mukwàbò yèyè ànu mulwè mwab’awu, awu ùmba ùnshiya. Nènku mvwà nshààla mwab’awu ndila mwadi ne: “To, kí mmwòmò to, kabìtu nàuku to. Ebi’s mbibì.”

⁹¹ Kàdi díngà ditùkù mèmè kubwela mu Bwikadi bwà Nzambì. Yèyè kunshintulula ne kumvwija mwàna wa balùme wa mùshindù mukwàbò. Ngàsà Wèndè ngwàkambweja mu Bwikadi Bwèndè. Kacya ncitukù muswè kuMùshiya nànsha. Ndi kaaba aka mpindyewu kùkaadi bidimu makùmi àsàtù ne byà mu njila. Ncyèna muswè kuBùshiya to. Ndi ne ditwishiiibwa dyà ne nèngìikalè ànuMù misangu yònsò. Nànsha lufù lwòlò lwìnè kalwàdyàkuntàpululakù ne Bwikadi Bwèndè to. To. Nèngìikalè Nèndè kashidi. Pàmwwènè Bwikadi Bwèndè bwà musangu wa kumpàla, ngàkeela lubilà bu Yeshàayi ne: “Dyàkabì dyànyì.”

Dìbà adi ki kundengaYè ne ngàsà Wendè. Ngàkalwa muntu mushintùlùke. Kaamuntu kapidyè diitabuuja kàvwà ne ciibidilu cyà kupàtuka mwab'ewu ne kwenza maalu a lukutukutu ne bikwàbò byònsò abi aku, kushintulukakù, ne kubangila ànu piinè apu ki mèmè kulwa mwan'Èndè. Kubangila ànu apu, ntu mujingè kufila nsòmbelu wanyì mujimà ku mudimu Wèndè, njinga ànu bwà ngìkalakù ne mikwàbò nsòmbelu binunu dikùmi yà kufila Bwèndè Yèyè. Ewu nùnkù ùkaadi wènda ùsùnsuka bikolè mpindyewu, bidimu makùmi àtaanu ne bisàtù byàpici. Pabwîpi ne makumi àsàtù ne bisàtù byà ku byòbì abi, anyì makumi àsàtù ne bibìdi byà ku byòbì bìdi mu Èvànjeeliyò. Ndi njinga bwà ngìkalakù ne bikwàbò cinunu byà mèmè mufwànyine kupicishilakù. Bwà cinyi? Pàngààkenzà ànu ne ngààbwèdi mu Bwikadi Bwèndè ne kumanya ne kùvwakù Kampànda Uvwa munangè ewu uvwabò kabàyi mwà kunanga awu, ne kùvwa Kampànda Uvwa munnangèku pàvwà muntu mukwàbò nànsha umwe kàyi munnangè, kùvwakù Kampànda Uvwa uncyùka pàvwà muntu mukwàbò nànsha umwe kàyi ùncyùka. Mèmè kwela mabòkò àànyì manyùngùlùkile nkùrusè Wendè, mèmè kumuupukila mu cyàdi cyànyì, ki mèmè ne Yèyè twètù kulwa umwe dìbà adi. Ki kubangila ànu piinè apu mèmè kuMunanga. Yèyè kushiya matobà à Mashì Èndè mu cyàdi cyànyì ne ku mwoyi wànyì, pa kundenga ne kumfwila luse ku mpèkaatù yànyì, nènku ndi ne disànka dilòlò edi dyà kwikalakù umwe wa ku Bèndè. Ncìtukù njinga kuumuka mu mwaba wà mu Dyulu ewu to, nànsha mùkaadi muteecyanganyi muteetètètèete misangu yàbùngì bwà kunswishisha; kàdi ndi mu dikùbiibwa mu kazùbù kàà ciikishilu kàà Nzambì, ne disànka mu dinanga ne ngàsà Wendè, ne ndi musòmbèlè luseke lwà ma-àlèluuyàh. Ekèlekèlè! Cìdi cìcyònkomoja mwoyi wànyì.

⁹² Ndi mMufùndila muntu yònsò udi muzengèle. Nyewù nkufùndilaYè kùdi wèwè udi kùyi ne ditèkemena awu. Wèwè utu kacya kùyikù mwanji kwikala mu Bwikadi Bwèndè awu, cintu cimwèpelè cìdi cìkèngela bwà wèwè kwenza nkutonda mpèkaatù yèbè ne kujingulula ne udi mupiile, ne Nzambì mmutùmine Mwanjèlo awu dýi dilòlò edi, udi ubiikidiibwa ne n'Nyumà Mwîmpè awu, wìkala mwà kuumusha mpèkaatù yèbè yònsò. Dìbà adi newèlè lubilà ne: “Mukalenge, mmèmè ewu, ntùmaaku.” Dìbà adi newèlè byanza muulu ne newìmbè ne: “NèmMutùmbishè! NèmMutùmbishè! Tùmbishàayi Mwànà wa mùkòòkò mushipa bwà bangènzàmpèkàatù. Mupàayi butùmbi, nwènù bantu bònsò, bwalu Mashì Èndè mmasukùle dikeji dyònsò.” Mèmè ndi muMunangè. Kàdi wèwè? Mwikàle ne mwoyi mu Bwikadi Bwèndè!

⁹³ Ndi mulwè ku cyambilu eku mu dindà emu, mudyũmvwè bibì byà kacya ne nsaama bikolè. . . Mvwa—mvwa mu Kentucky mwàmwa lumingu lushààle elu ne bàmwè balundà bàanyì bàà pa mwoyi bàdi basòmbe apa aba. Bu mèmè mushààlemù ntàntà

mule, nùnkù mbanshebèye, nùnkù mbanshebèye cyà bushùwà, ne musàngèelu awu, bàmwè bàà ku benji bàà cikukù bàà batàmbe bwîmpè bânkaadîku mumanyè kacya bândèla. Nènku pàndì nguukuta bu lunyimù, ngamba kutaayika apu ki ne: “Mwanèètù Branham, kwénàku muswè kudyà cikampànda eci anyi?” Ne ciinè aci ànu cîmpè cyà dikèma mu mùshindù wà ne, mvwa nteeta ànu kucîpwekesha munda ku bukolè. Mvwa nshààla ànu muukùte mu mùshindù wà ncìciyi nànsha mwà kunyungakù to. Ncì—ncìciwàkù mwà kulààla to, nènku mvwa njuuka nyùngulukakù katanci. Nènku ncìvwa mudyùmvwè bîmpè menemene to pângààbwedì mwab’ewu mu dîndà emu apu. Kàdi ndi mwenzè ànu mbwela mu Bwikadi Bwèndè anyi, cyùmba cikòsa bwalu’s. Ncyumbè cikòse bwalu, byònsò byùmba bijìmina dîbà adi. Ncyà bushùwà. Kaa, kwikala ne mwoyi mu Bwikadi Bwèndè’s wè!

NémMutùmbishè, némMutùmbishè,
Tùmbishàayi Mwànà wa mùkòkò mushipa
bwà bangènzàmpèkààtù;
Mupàayi butùmbi nwènu bantu bònsò,
Bwalu Mashi Èndè mmasukùle dikeji dyònsò.

Twìnyikààyaaku mitù yètù mpindyewu.

[Mwanèètù Branham ùdi wimbila *NémMutùmbishè* mu matàma—Muf.]

Bwalu Yèyè mmungenzèle byàbùngì be;
Mmumfwile luse ku dishipa dyànyì dyà
mikenji;
Ne Mashi Èndè mmasukùle mpèkàatù wànyì.
NémMutùmbishè, némMutùmbishè,
Tùmbishàayi Mwànà wa mùkòkò mushipa
bwà bangènzàmpèkààtù;
Mupàayi butùmbi nwènu bantu bònsò,
Bwalu Mashi Èndè mmasukùle dikeji dyònsò.

[Mwanèètù Branham ùdi wimbila *NémMutùmbishè* mu matàma—Muf.]

⁹⁴ Mpindyewu pawikalà mwab’ewu dilòlò edi...Ne ndi mumanyè ne Bwikadi Bwèndè bùdi kaaba aka. Pàmvwà mwimanè muntu mwàmwa kwènji katanci, ne mwànà mukèsè wa bakàji wa mu Église de Dieu, Nyumà Mwîmpè kubwela e kulwa pambidi pàànyì pàmvwà munkaci mwà kusambidila mwànà mukèsè awu apu. Baledi bèndè bàvwa balwè bàfùmina ku citùùdilu cyà Église de Dieu wa ku Anderson. Ki mutàngidi wa kuntwaku, bu mùvwàye mumanyè mwànà awu, bangàngàbukà bambè ne “kì nkufwànyine...ùdi ne cyà kufwà katanci aka, bwà kànsèrè kàà mu mashi.” Mwànà mukèsè wa bakàji, wa kalolo awu, mu bikondo byèndè byà ndekeelu dîbà adi. Kulwayè paanyimà apu e kunkwàtayè mu cyanza ne kèndè kaacyanza kakesè aku, kùlàkàne kwònsò, ne

nshìngì ne bikwàbò bìvwàbo bamutwèmu abi, kashààle bleu. Mémè kumutàngila, kumòna cikèènà-kumòna. Baledi bèndè bàvwa ànu bàbala mukàndà mwab'awu. Kabàvwa ne cìvwàbo bamanyè pa bwalu abu to. Mutàngidi wa bônso wa mu citùùdilu amu kubàmbilayè, kwambayè bwà kulwàbò ne mwànà awu mwab'ewu. Bàvwa baswè kwalukila patùvwà ne mudimu wà dyondopa apu. Ki mémè ne: "Lwàyi ne mwànà awu mpindyewu," mvwa mudyūmvwè mulombòdìibwe.

⁹⁵ Pàmvwà mwimàne mwômò amu mene apu, Nyumà Mwîmpè kwalukila buludì e kupàtula bwalu-bulonda bwà mwànà awu. Yèyè kwamba byònsò mwàkenzekàbi, cìvwàbo benzè. Kwamba kalumbilà kàà mwànà mukèsè wa bakàji awu, kàvwa kàà kwikala mwimbi wa pyànò. Ki maamù awu kwambayè ànu kwela lubilà lukolè. Ki taatù awu kwambayè ne: "Aci mbulelèlè bwà Nzambi." Mmusòmbe mwab'awu mene mu kàshinyi mpindyewu munkaci mwà kucitèeleja, kàyi mupetè mwà kubwela to, mmusòmbèle pambèlù pààpa ùcitèeleja mpindyewu.

⁹⁶ Kulwakù cibwikilu cinènè cyà mundìdimbì mulembèlèle kumutù kwà mwànà awu. Ki mémè kwamba ne: "Sàtaanà, udi mucimùnyìibwe." "Kùtu ne kànsungànsungà kùdi bantu to, Nzambi. Nènku ku bukòlè bwà dibìikà Dyèbè dyà ku lufù, ne mémè bu musadidi Webè, ndi ngiipata démon ewu pa mwànà ewu." Bukènkè bukòlè bunènè kupenyabù kumutù kwèndè, kumba kùjika. Amen. Huh? Bushùwà's, Yèyè mmukùmbànyine butùmbi bwònsò!

⁹⁷ Yèyè mmumanyè maalu ònsò. Yèyè mmumanyè mwoyi wèbè. Ne wèwè udi mumanyè cyùdì wela meeji aci; mmucimanyè, Yèyè pèndè. Kwòkò kampèkaatù kakesè kakulamàte dilòòlò edi, ne kùyi muswè kuya naakù mu Bwikadi bwà Nzambi, swàku bwà musangu ewu kàbìdì wèlè cianza muulu wamba ne: "Mwanèètù Branham, nsambidilèku, ndi muswè kwikala mu Bwikadi Bwèndè, mu Ditùkù adi, nciyi ne dipiila to." Nzambi ànùbènèshè. Byanza byàbùngi, Nzambi ngudi ucimòna. Mu Bwikadi Bwèndè. Mpindyewu nènkwambilè cyà wèwè kwenza. Mpindyewu tèeleja ànu ne ntèmà yònsò. Enzà mwàkenzà Davidi amu, tèeka Mukalenge kumpàlà kwèbè mpindyewu mene. Tèeka Mukalenge pankaci pèèbè wèwè ne mpèkaatù awu, cyònsò cidì kampèkaatù kiinè kakesè kàdi kàkutuucishà musòdi aku. Ncifwànyine kwikala mashimi, ncifwànyine kwikala bwìvi, ncifwànyine kwikala dyela dyà meeji mabi, ncifwànyine kwikala cijjì, ncifwànyine kwikala dinwà dyà maalà, ncifwànyine kwikala dinwà dyà mfwankà, ncifwànyine kwikala ditwà dyà twalàtà twà mfrangà. Mémè ncyèna mumanyè ne ncinyi to. Ncifwànyine kwikala dyalakana. Ncifwànyine kwikala cintu kanà cyònsò. Mémè ncyèna mumanyè ne ncinyi to. Cyònsò cidici aci, tèeka Mukalenge kwèbè. Nènku dibà adi mwoyi wèbè newùcyonkomokè, ne mubidi wèbè newikishè mu

ditèkemenà, bwalu udi mumanyè ne Kilistò ngwàkalaya ne Yèyè neàjuulè cyàkàbìdì ku matùkù a ndekeelu. PààmwènekàYe, netwikalè bafwànàngàne Nendè. Kwènàku muswè kwenza nàнку mpindyewu, patùdì tusambila apa anyi?

⁹⁸ Taatù wetù wa mu Dyulu, nkaaDiyiisha kakesè kakòsolola tutùpà tutùpà kùdì musadidi Webè muzengèle. Kàdi mwwa mwelè ànu meeji ku cyena-bwalu cya “kwikala musòmbèle mu Bwikadi bwà Nzambi” aci. Nènku nyewù tumòna dilòòlò edi cikùmà cikaadìci cyenzè pa bantu bàà cijila pa kubwela mu Bwikadi Bwèbè, cikùmà cìvwàci cyenzè pa bòbò abu. Beena meeji, bapròfètà banènè bàà bukolè balongolola kùdì Nzambi, ne batùma bwà kuyiisha Diyì, kàdi bàtwilangana Nendè mpàla ne mpàla ne bàdìshìnda panshì bu muntu mufwè. Citwènzà ncinyì mu ditùkù adi, Mukalenge? Nyewù twedyàngányìku meeji. Tudi beelàngànepù meeji. Byanza bitwè ku makùmi ànaayi anyi makùmi àtaanu byedyàngányìpu meeji, Mukalenge, bwalu mbafùme ku dyela byanza abi muulu, anyi mwoyi mwinshì mwa cyanza aci, beelàngàne meeji pa ditwilangana Nendè kacya twàbanga kwakula. Ncinyì cìvwàbo bafwànyìne kwenza bu ne bìvwa bikèngela kutwilanganabò Nendè?

⁹⁹ Byànyì byanza, Mukalenge, mbyela muulu. Cingènzà ncinyì? Mpindyewu, Taatù, ndi ne bintu byàbùngì bintù ngenza bibì. Ndi mfùma ku ditonda mpèkaatù wanyì mu dindà emu kumpàlà kwà èkèleeziyà, mùmvwà muKutondèleyè ku lusongo lwà mukùnà kwàka mu dindà adi pàvwà cipeepèlè cituuta ne nèjè ùlòka apu, ne kwìnè ku lusongo lwà mukùnà aku, mùmvwà mudilè mwadi ne muKulòmbè bwà kumfwilakù luse bwà dikùtakana dyànyì. Ne mùshindù mwinè wùmvwà nciina bikolè bwà kulwa kumpàlà kwà bàna bèètù, bàdì bàmwè bàà kùdìbo bàngangata bu musadidi Webè mupròfètà. Nènku, Mukalenge, mùshindù mwinè wùmvwà ngumvwa bìngenza bibì bwà kulwa kumpàlà kwàbò bwà kubàmbila cyenzedi cikùtākàne mùndì mufwànyìne kwenza cintu cyà mùshindù awu, kàdi, Nzambi, mbìmpè bwà musùukà wànyì bwà mèmè kutonda mpèkaatù yànyì nciyi nyisokoka to. Pa nàнку bwà kwikala ne meeji matòòke kumpàlà Kwèbè, ne kumpàlà kwà bantu mene, ngàamutondù, Mukalenge. Ndi mupìile, ndi mupìile ànu menemene. Ndi ndòmba difwidiibwa dyà luse.

¹⁰⁰ Ne pashìishe, Taatù, ndi ne maalu fwèfwèfwè pa bìdì bìKutàngila, mu diKukwàcila dyà mudimu, misangu yàbùngì mvwàkù pàmwàpa mwà kwikala mutùngùnùke kàdi nciyi mucyènzè to. Taatù, ndi ntonda mpèkaatù yànyì. Ndi muswè bwà Mwanjèlo wa Nzambi ànkezùlèku ku cyòci aci, ku Mashi a Yesù. Bikwàbò byanza mbyediibwe muulu dilòòlò edi, bàmwè bàà kùdìbo pàmwàpa kabàtukù banjì kulòmba luse kacya kwònsò eku to; kàdi ndi mutwishiiibwe bwà cintu cimwèpelè eci ne, twètù batondè mpèkaatù yètù, Nzambi neàyikùpùlè, àyèlè mu mbù wa cipwàmwoyi ne kàyìkù uyivùluka kàbìdì—kàbìdì

to. Nènku, Taatù, pàndi ntonda yànyì apa, yà diditwàla dibi kumpàlà kwà bantu abu, ncivwa muditwàle mèmè mwìnè bu musadidi wa Kilistò to. To. Mvwa ncìna ne nkwèpì kùvwà muntu awu mufwànyine kumfiikila munda ne ngeela meeji ne ncivwa muswè kumutàpa ku mwoyi, kàdi ncivwa mwelè meeji ku cìmvwà munkaci mwà diKwenzela Wèwè to, Mukalenge. Nènku mpindyewu nyewù—nyewù ndòmba bwà Ùmfwilèkù luse. Nènku mpindyewu, Taatù, ndi mumanyè ne mèmè mulòmbe luse ndi mpeta luse, ne Wèwè wayèdi mu mbù wa cipwàmwoyi, ne Kwàdyàkuyivùlukakù kàbidi to. Nzambì, mèmè ndi ne kusàkidila bwà cyòci aci.

¹⁰¹ Nènku ndi ndòmba bwà Wèwè kwenzakù ne muntu yònsò udi kaaba aka, udi ne mpèkaatù, mpèkaatù wa ùmutuucisha musòdi mu bwalu kanà bwònsò kumpàlà kwèndè awu, swàku àmuumùshè ne àteekè Mukalenge kumpàlà kwèndè mwàkenzà Davidi amu. Bwalu mpindyewu tudi twela lubilà lukolè ne: “Dyàkabi dyànyì, bwalu ngàmònu Butùmbi bwà Nzambì. Mèmè ndi mulùmè wa mishìkù mibiipe, anyì mukàji ànyì mwànà wa bakàji wa mishìkù mibiipe, mwànà wa balùmè, anyì cintu kampànda.” Cyònsò citùdi bafwànyine kwikala aci, tudi babiipe, ne tudi tulòmba bwà Mashi a Yesù Kilistò, Mulàmbù mukùmbànàngàne awu, wùtùkezùlè ku mpèkaatù yònsò, bwà twamònakù mwà kusòmbela kashidi mu Bwikadi Bwèndè. Enzàku bwà tùumukè kaaba aka dilòlò edi ne myoyi yètù yicyònkomoka, ne mubidi wètù mwikishe mu ditèkemena, bamanyè ne, pààlwà Yesù, netùbiishiibwè ku lufù pàmwè Nèndè mu difwànangana Nèndè, ne netùtwilanganè Nèndè mu mpeepèlè, mu Dyambwibwa, piikalà ndekeelu wa byònsò dibala dyà kwenda kwalukila cyànyimà adi dijikè. Tudi tumòna ne cikondo cyà mwandamutekètè cyà èkèleeziyà cìkaadi cimanè kubadiibwa, ne tukàadi pabwìpì mpindyewu bwà kjuuuka kuya. Tudi tulòmba, Nzambì, bwà Wèwè, kumpàlà kwà Wèwè kwinjila ciibi, kwòkò muntu kaaba aka dilòlò edi utu kacya kàyikù mwanjì kubwela to, swàku bwà àlwijakajè àbwelè ne lùkàsà lwònsò, bwalu tudi tumvwa ne ciibi cyà luse, pankaci pàa luse ne cilumbulwidi, cidi munkaci mwà kukàngiibwa. Aba bàdi baswè kwitaba luse nebàbwelè. Aba bàdi kabàyi baswè kubwela abu nebiikalè ne cyà kupicila ku cilumbulwidi. Nzambì ngudi ukànga ciibi. Swàku bwà kakwikadi dilòlò edi ciibi cikàngila yònsò wa ku bangènzàmpèkàatù bàdi bàtondà aba to. Swàku bwa twètù bònsò tùpetè difwidiibwa dyà luse ne luse lwinè. Mu Dìna dyà Yesù Kilistò.

¹⁰² Nènku mpindyewu, Taatù, bwà babèedi ne beena ntàtu, bwà aba bàdi mu lukèngelu, ndi ndòmbakù bwà ngàsà Webè àfilè byònsò bìdibo naabi lukèngelu abi. Swàku bwà bàbwelè mu Kilistò, mu Bwikadi Bwèndè. Tèekakù Kilistò, Kilistò, mulayi awu ne: “Wàkatàpiibwa mpùtà bwà dishipa dyànyì dyà mikenji, ki mpèkaatù yànyì nyòyi ayi. ‘Ku mibùndàbùndà Yèndè

ndi mwondopiibwe,' dîbà adi ndi ntèeka Mukalenge kumpalà kwà disaamà dyànyì. 'Yèyè ùdi ku dyabalumè dyànyì, ne ncyàkunyungishiibwakù to,' dîbà adi ndi ntungunuka ne kwenda ne dikima, njikula ne ndi mwondopiibwe. 'Ku mibündabündà Yèndè ndi mwondopiibwe.'" Enzàku nàнку, Mukalenge, bwà yònsò wa kùdîbo. Ne tudi bamanyè ne twètù tutonda ne myoyi yètù, anyì ne mishikù yètù, ne twitabuujà munda mwà myoyi yètù, dîbà adi tudi tupeta dijinga dyètù.

¹⁰³ Wèwè wàkamba ne: "Paùdi wamba cintu kanà cyònsò, itàbùùjà ne cidi cyènzeka, udi mwà kupeta ciwàmbi aci." Tudi twitabuujà nàнку, Taatù, ne twitabuujà ne Wèwè neùtùkezùlè ku mpèkaatù yètù yònsò, ne newòndopè mabèèdi ètù ònsò, ne neùtupè ngàsà, Mukalenge, bwà kuKukwàcila mudimu.

¹⁰⁴ Ikàlàku ne bantu aba. Bààbùngì bàà kùdîbo nebènzè ngendu mu njila yà mîdimà dilòlòlò edi. Bààbùngì bàà kùdîbo nebènzè ngendu yà ntàntà yà kilòmèètà yàbùngì. Kwitabikù bwà cintu nànsha cimwè cibènzèkèlè to, Mukalenge. Mbakòsòlòlè ditungà bwà kulwa kusòmba kaaba aka bwà kutèèleja dibala dyà kwenda kwalukila paanyimà, bwà kumòna mutùkaavwà pabwìpì ne cikondo cyà nshikidilu. Mpindyewu nyewù ngàbàlòmbu bwà kuumuka kuyabò, batèèke Nzambì kumpalà kwàbò, misangu yònsò ànu kumpalà kwàbò, kumpalà kwà cintu cikwàbò kanà cyònsò. Kumpalà kwà lwendu lwàbò, kumpalà kwà dyasa dyàbò dyà lwendu, kumpalà kwà wabò. . . kumpalà kwà kujuukabò, paanyimà pàà bamanè kuya kalààla, misangu yònsò kumpalà kwà kulààlabò, mwaba kanà wònsò wùdibi, bǎnji bâteekè Nzambì dyàmbedi! "Bwalu Yèyè ùdi ku dyabalumè dyànyì, ne mèmè ncyàkunyungishiibwa to." Pashiishe swàku bwà myoyi yàbò yìcyonkomokè, pa kumanya ne bàkaadi ne cidîbo balòmbè aci, bwalu Nzambì ngudi mucilayè, nènku mubidi wàbò newikishè mu ditèkemena. Enzàku nàнку, Mukalenge, bwalu tudi tulòmba nùнку mu Dìnà dyà Yesù Kìlistò. Amen.

NèmMutùmbishè, nèmMutùmbishè,
Tùmbishàayi Mwànà wa mùkòdòkò mushipa
bwà bangènzàmpèkaatù;
Mupàayi butùmbi nwènù bantu bònsò,
Bwalu Mashi Èndè mmasukùle dikeji dyònsò.

¹⁰⁵ Mpindyewu udi witabuujà ne watèèki Mukalenge pankaci pèèbè ne mpèkaatù webè, pankaci pèèbè ne bubèèdi bwèbè, pankaci pèèbè ne cilèmà cyèbè, pankaci pèèbè ne njila yèbè anyì? "Mukalenge ùdi misangu yònsò ànu kumpalà kwànyì, ne mèmè ndi mu Bwikadi Bwèndè. Musangu wàlondà wùngààbangà kukwàcisha mucì wà mfwankà, Mukalenge ùdi kumpalà kwànyì. Musangu wàlondà wùngààbangà kwalakana, Mukalenge ùdi kumpalà kwànyì. Musangu wàlondà wùngààbangà kwamba nì ncinyì nì ncinyì cyònsò cyà mafi, Mukalenge ùdi kumpalà kwànyì. Musangu wàlondà

wúngààbangà kwamba cintu cyà cibì, Mukalenge ùdi kumpàlà kwànyì. Ne ncyàkunyungishiibwakù to. Amen. Nèngiikalè musòmbèle mu Bwikadi Bwèndè ditùkù dyònsò, mu byenzedi byanyì, ditùkù dyònsò mu dyakula dyànyì. Nèngiikalè ngenda byenzè bu ne Mukalenge ùdi kumpàlà kwànyì, bwalu dilòòlò edi ngààMutèèki kumpàlà kwànyì. Ncyàkunyungishiibwakù to.” Nudi baMunangè anyi?

¹⁰⁶ Mpindyewu, tùjuukilaayaaku kuulu mpindyewu. Kaa, ndi ndyùmvwa ànu bimpè be. Ndi ndyùmvwa ànu bu ne ncyèna muswè kwalukila kumbèlu to. Kàdi nudi bamanyè ne tucidi ànu tusunsa tutwè ku makùmi àbìdi ne tùtaanu kumpàlà kwà dībà citèemà, ne mèmè ndi ne mèbà matwè ku àbìdi kumpàlà kwà dībà. Ki mbilenga bilayà anyi? Kaa, ekèlekèle! Kàdi mpindyewu patùdi tuumuka apa, tùvulukàayi ne, tudi ne cyà kwangata Dìna dyà Yesù kwenda naadi, bu ngabu ku butèyi bwònsò. Ne pàatùjìngà mateeciibwa ku nseke ne ku nseke yònsò... àteeta kutùpangisha bwà kuvùluka aci, nungàna ànu Dìna dyà cijila adi mu disambila.

Angàtà Dìna dyà Yesù wèndè naadi,
Wèwè mwànà wa kanyinganyinga ne dikènga;
Nedìkupè disànkà ne busàmbi,
Kaa, ndà naaDì kwònsò kùyaaya.

Dìna dyà mushinga mukolè, (Dìna dyà
mushinga mukolè!) Éyi dyà bupolè be!
Ditèkemena dyà buloba ne disànkà dyà Dyulu;
Dìna dyà mushinga mukolè, (Dìna dyà
mushinga mukolè!) Éyi dyà bupolè be!
Ditèkemena dyà buloba ne disànkà dyà Dyulu.

¹⁰⁷ Mbanganyì bàdi mpaasàtà wetù ùsànkisha, Mwanèètù Neville? [Disangisha didi dyàmba ne: “Amen.”—Muf.] Kanwènaayikù ne kusàkidila kùdi Mukalenge bwà muntu mwimpè, wa meeji matòoke, wa ditùkù dyònsò, udi witabuuja Evànjeeliyò anyi? [“Amen.”] Ne yèye ùdi wènzà mudimu mulenga wà dikèma mu kutùmikila kwà Mèyi matumà a Nzambi, ne kuyiisha kwà Dìyì ne kulama kwà cyuyüya cinènè cyà nyumà eci mu èkèleeziyà dībà dyònsò. Vùlukàayi ne, nkàadi mukatwè ku Còtè Est kwàka, mukòsolwèle ku Sud, muyè ku Còtè Ouest, ne mupicile mu Canada, kàdi ncutukù mupetè èkèleeziyà udi wa nyumà mùdi èkèleeziyà ewu kaaba aka mene to. Bàkaadi bayè ne kwà nàka, èyowà, ànyì ndikolesha dyà maalu, anyì mbayè bipapù, anyì mbakwàte mashikà byà kabàyi ànu mwà kunyungakù to. Ki cyònsò cìdiku.

¹⁰⁸ Mpindyewu, nudi banangàngàne muntu ne mukwèndè anyi? [Disangisha didi dyàmba ne: “Amen.”—Muf.] Kaa, labùlàngànaayi ku cyanza muntu ne mukwèndè, nwamba ne: “Mukalenge àtumbè.”

109 [Mwanèètù Branham udi ùlabula bantu ku cyanza—Muf.] Mukalenge àtumbè. Mukalenge àtumbè. Mukalenge àtumbè. Mukalenge àtumbè, mwanèètù wa bakàjì. Mukalenge àtumbè. Ndi ne disànkà bwà mùdì kaaba aka, mwanèètù wa balùmè. Mukalenge àtumbè, mwanèètù wa bakàjì. Nzambi àkubènèshè. Èyo. Nzambi àkubènèshè. Netwènzè nàнку. Nzambi àkubènèshè. Ndi mumanyè cìdì cikukèngela. Nzambi àkubènèshè. Nzambi àkubènèshè.

Angàtà Dìna dyà Yesù wèndè naadi,
 Bu Ngabu ku butèyi bwònsò;
 Pààkujìngà mateeciibwa ku nseke ne ku nseke
 yònsò, (Udi wenza cinyi?)
 Nungànà Dìna dyà Cijila adi mu disambila.
 Dìna dyà mushinga mukolè, (Dìna dyà
 mushinga mukolè!) Éyi dyà bupòle be! (Éyi
 dyà bupòle be!)
 Ditàkemena dyà buloba ne disànkà dyà Dyulu;
 Dìna dyà mushinga mukolè, (Dìna dyà
 mushinga mukolè!) Éyi dyà bupòle be!
 Ditàkemena dyà buloba ne disànkà dyà Dyulu.

110 Twìnyikààyaaku mitù yetù mpindyewu. Bitùùlùbitùùlù menemene, katùpù aci mwoyi's. Twìmbààyi cyàkàbìdì citùminyì aci.

Angàtà Dìna dyà Yesù wèndè naadi, (Bwà
 cinyi?)
 Bu Ngabu ku butèyi bwònsò; (Pàdì Sàtaanà
 ùteeta bwà kukukwàta mu butèyi.)
 Pààkujìngà mateeciibwa ku nseke ne ku nseke
 yònsò, (Udi wenza cinyi?)
 Nungànà ànu Dìna dyà Cijila adi...
 (“Bwalu Mukalenge ùdì kumpàlà kwànyì;
 ncyàkunyungishiibwakù to!”)
 Dìna dyà mushinga mukolè, (Dìna dyà
 mushinga mukolè!) Éyi dyà bupòle be!

Mwanèètù Neville.



MU B̄WIKADI B̄WÈNDÈ LUA62-0909E

(In His Presence)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyàlumuŋu dilòlò, mu matùkù 9 a ngondo wa citèemà, cidimu cyà 1962, mu Branham Tabernacle mu Jeffersonville, Indiana, U.S.A. Ndyumusha pa mukaba wa mēyì ne dituuta ku cyamu mu kaabujima kààdì mu Anglais. Nkudimwinu wa mu Ciluba ewu mmutuuta ku cyamu ne mwabanya kùdì Voice Of God Recordings.

CILUBA

©2023 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org